

*ORDE do 13 de febreiro de 2026 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (códigos de procedemento MR250A, MR239G, MR239K, MR239O, MR239Q, MR240D, MR241C e MR241D).*

O Regulamento (UE) nº 2021/2115 do Parlamento Europeo e do Consello, do 2 de decembro de 2021, polo que se establecen normas en relación coa axuda aos plans estratéxicos que deben elaborar os Estados membros no marco da política agrícola común (plans estratéxicos da PAC), financiada con cargo ao Fondo Europeo Agrícola de Garantía (FEAGA) e ao Fondo Europeo Agrícola de Desenvolvemento Rural (Feader), e polo que se derrogan os Regulamentos (UE) nº 1305/2013 e (UE) nº 1307/2013, supón un cambio substancial na PAC, que pasa a ser unha política orientada á consecución de resultados concretos, vinculados aos tres obxectivos xerais do artigo 5 do regulamento, isto é, fomentar un sector agrícola intelixente, competitivo, resiliente e diversificado que garanta a seguridade alimentaria a longo prazo; apoiar e reforzar a protección do ambiente, incluída a biodiversidade e a acción polo clima, e contribuír a alcanzar os obxectivos ambientais e climáticos da Unión, entre eles os compromisos contraídos en virtude do Acordo de París e fortalecer o tecido socioeconómico das zonas rurais.

Esta nova orientación articúlase sobre unha maior subsidiariedade aos Estados membros, que deben ser quen, sobre a base da situación e necesidades específicas, teñen que deseñar as súas propias intervencións. Con este novo enfoque, España, tras unha análise rigorosa da situación de partida, que permitiu identificar e priorizar as necesidades vinculadas a cada un destes obxectivos, propuxo un Plan estratéxico 2023-2027 nacional da política agrícola común (PAC) do Reino de España 2023-2027 (en adiante, PEPAC 2023-2027), que ten como obxectivo o desenvolvemento sustentable da agricultura, da alimentación e das zonas rurais para garantir a seguridade alimentaria da sociedade a través dun sector competitivo e un medio rural vivo.



Co fin de poder realizar unha correcta implantación e xestión do conxunto de intervencións que se inclúen no PEPAC 2023-2027, faise necesario dispoñer das adecuadas ferramentas xurídicas que permitan unha aplicación harmonizada de todas as medidas no territorio nacional. Para tal fin, durante os anos 2022 e 2023 aprobose diversa normativa na que se establecen as regras que se aplican ás intervencións sectoriais da PAC e outras disposicións concomitantes, composta por diversos reais decretos que regulan aspectos necesarios para a súa aplicación: normas para a aplicación das intervencións en forma de pagamentos directos, requisitos comúns e solicitude única; sistema de dereitos de axuda básica á renda para a sustentabilidade; regulación da condicionalidade reforzada e social; sistema integrado de xestión e control, e gobernanza dos fondos europeos agrícolas.

O título IV do Regulamento (UE) nº 2021/2116 do Parlamento e do Consello, do 2 de decembro de 2021, sobre o financiamento, a xestión e o seguimento da política agrícola común e polo que se derroga o Regulamento (UE) nº 1306/2013, conságrase aos sistemas de control e sancións, mantendo basicamente os principios xerais actuais. No que se refire ao Sistema integrado de xestión e control (SIXC), os devanditos principios xerais desenvólvense no Regulamento delegado (UE) nº 2022/1172 da Comisión, do 4 de maio de 2022, polo que se completa o Regulamento (UE) nº 2021/2116 do Parlamento Europeo e do Consello no que respecta ao Sistema integrado de xestión e control da política agrícola común e a aplicación e o cálculo das sancións administrativas no marco da condicionalidade, e no Regulamento de execución (UE) nº 2022/1173 da Comisión, do 31 de maio de 2022, polo que se establecen disposicións de aplicación do Regulamento (UE) nº 2021/2116 do Parlamento Europeo e do Consello no que respecta ao Sistema integrado de xestión e control da política agrícola común. Tamén se regulan aspectos específicos do control do cânabo e do algodón no Regulamento delegado (UE) nº 2022/126 da Comisión, do 7 de decembro de 2021, polo que se completa o Regulamento (UE) nº 2021/2115 do Parlamento Europeo e do Consello no relativo aos requisitos adicionais para determinados tipos de intervención especificados polos Estados membros nos seus plans estratéxicos da PAC para o período 2023-2027 en virtude do antedito regulamento, e ás normas sobre a proporción relativa á norma 1 das boas condicións agrarias e ambientais (BCAM). Todo isto constitúe



fundamentalmente o marco da Unión Europea con base no cal esta orde desenvolve os principios da xestión e control das intervencións do PEPAC 2023-2027 e do resto de medidas financiadas con cargo aos fondos agrícolas en Galicia.

De acordo coa normativa citada nos parágrafos anteriores, para protexer os intereses financeiros do orzamento da Unión é necesario implantar sistemas para asegurarse de que as intervencións financiadas polo FEAGA e o Feader se levan efectivamente a cabo e se executan correctamente, ao mesmo tempo que se mantén o sólido marco de boa xestión financeira vixente.

Procede manter os principais elementos xa existentes do sistema integrado e, en particular, as disposicións relativas a un sistema de identificación de parcelas agrícolas, un sistema de solicitudes xeoespaciais e un sistema de solicitudes baseado nos animais, un sistema de identificación e rexistro de dereitos de pagamento, un sistema de rexistro da identidade das persoas beneficiarias e un sistema de control e sanción. É necesario seguir utilizando os datos ou produtos de información proporcionados polo programa Copernicus, ademais de tecnoloxías da información tales como os sistemas Galileo e EGNOS (European Geostationary Navigation Overlay Service), co fin de garantir que se dispoña de datos exhaustivos e comparables para efectuar o seguimento da política agroambiental e climática, que inclúa as repercusións da PAC, o rendemento ambiental e o progreso cara aos obxectivos da Unión Europea, e impulsar a utilización de datos e información completos, gratuítos e abertos recompilados polos satélites Sentinel e os servizos de Copernicus. Para tal fin, o sistema integrado debe incluír tamén un sistema de monitorización de superficies.

O sistema de xestión e control, como o seu propio nome indica, debe incluír a realización de controis en que se avalíe o cumprimento dos criterios de subvencionabilidade e outras condicións, así como as obrigacións que figuren nos plans estratéxicos da PAC e as normas aplicables da Unión Europea. Mantense un sistema de controis administrativos á totalidade dos expedientes, complementado cun sistema de controis por monitorización para as intervencións baseadas en



superficies e un sistema de controis sobre o terreo para as intervencións baseadas nos animais.

Os pagamentos directos permiten estabilizar a renda das persoas agricultoras e compensalas pola prestación de servizos públicos de valor incalculable como a protección do ambiente, o benestar dos animais e os alimentos seguros e de calidade. Estes servizos públicos son aínda máis importantes se se ten en conta que as normas europeas son exixentes. Isto encarece a produción de alimentos en Europa con respecto a doutros países non comunitarios que impoñen normas menos rigorosas. Sen os pagamentos directos, as persoas agricultoras europeas non poderían competir coas doutros países e, pola súa vez, atender as exixencias específicas das persoas consumidoras de Europa.

Doutra banda, os pagamentos a zonas con limitacións naturais e as axudas relativas ás intervencións medioambientais e climáticas teñen o carácter de pagamentos compensatorios, ben pola zona en que exercen a actividade as persoas agricultoras ou ben polos custos adicionais e as perdas de ingresos derivados dos compromisos asumidos por elas en relación co sistema de produción agrícola ou gandeiro adoptado para a mellora do ambiente e do ámbito natural.

Polo tanto, os pagamentos directos á agricultura e á gandaría, os pagamentos a zonas con limitacións naturais, as axudas relativas ás intervencións ambientais e climáticas reguladas por esta orde deben considerarse incluídas no artigo 53.d) da Lei 4/2025, do 23 de decembro, de orzamentos xerais da Comunidade Autónoma de Galicia para o ano 2026, e as persoas beneficiarias non teñen a obriga de achegar os xustificantes de estar ao día no cumprimento das obrigas tributarias ou fronte á Seguridade Social ou de non ter pendente de pagamento ningunha débeda coa Administración pública da Comunidade Autónoma, que será substituída pola declaración responsable da persoa solicitante de estar ao día no cumprimento das obrigas tributarias ou fronte á Seguridade Social, así como de non ter pendente de pagamento ningunha outra débeda coa Administración pública da Comunidade Autónoma.



Ademais, os expedientes do Fondo Galego de Garantía Agraria (Fogga) en que se exerza función de intermediación na xestión do FEAGA serán xestionados como operacións extraorxamentarias consonte o sinalado no artigo 46.4 do Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orxamentario de Galicia.

En consecuencia, de conformidade co previsto no artigo 30.1.3 do Estatuto de autonomía de Galicia, no uso das facultades que me confiren a Lei 9/2007, do 13 de xuño, de subvencións de Galicia, e a Lei 1/1983, do 22 de febreiro, de normas reguladoras da Xunta e da súa Presidencia,

DISPOÑO:

TÍTULO I

### **Disposicións xerais**

CAPÍTULO I

### **Obxecto e definicións**

#### *Artigo 1. Obxecto e ámbito de aplicación*

1. Esta orde ten por obxecto regular e convocar, na Comunidade Autónoma de Galicia, as axudas directas e as axudas ao desenvolvemento rural suxeitas ao sistema integrado de xestión e control (SIXC) indicadas no artigo 2, do PEPAC 2023-2027:

As axudas directas á agricultura e á gandería do PEPAC 2023-2027 financiadas co FEAGA, anualidade 2026:

Axuda básica á renda para a sustentabilidade.

Axuda redistributiva complementaria á renda para a sustentabilidade.

Axuda complementaria á renda para persoas agricultoras mozas.



Réximes en favor do clima, o ambiente e o benestar animal (ecorreximes) de acordo coas seguintes prácticas:

- Pastoreo extensivo.
- Illas de biodiversidade en superficies de pastos ou sega sustentable.
- Rotación de cultivos con especies mellorantes.
- Sementeira directa.
- Cuberta vexetal espontánea ou sementada.
- Cuberta inerte.
- Establecemento de illas de biodiversidade.

Axudas asociadas:

- Axuda asociada para as persoas gandeiras de vacún de carne en extensivo.
- Axuda asociada para o engorde de tenreiros na explotación de nacemento.
- Axuda asociada para o engorde sustentable de tenreiros.
- Axuda asociada para a produción sustentable de leite de vaca.
- Axuda asociada para as persoas gandeiras de ovino e cabrún de carne en extensivo e semiextensivo.
- Axuda asociada para a produción sustentable de leite de ovella e cabra.
- Axuda asociada para as persoas gandeiras de ovino e cabrún en extensivo sen pastos, que pastorean restrollos, barbeitos e restos hortofrutícolas.
- Axuda asociada á produción sustentable de proteínas de orixe vexetal.
- Axuda asociada ao oliveiral con dificultades específicas e alto valor ambiental.

Os compromisos de mantemento de forestacións, cofinanciados polo Feader no marco do PEPAC 23-27 (solicitudes de pagamento da anualidade 2026 da Intervención 6502.2 – Compromisos de mantemento de forestación e sistemas agroforestais- subintervención 65022.01 – Mantemento de forestacións ou repoboacións forestais).



Os compromisos de servizos ecosistémicos, cofinanciados polo Feader no marco do PEPAC 2023-2027 (solicitudes de pagamento da anualidade 2026 da Intervención 6502.1 – Compromisos forestais de xestión - subintervencións 65021.05 e 65021.06 – Certificación de servizos ecosistémicos).

As axudas a zonas con limitacións naturais ou outras limitacións específicas incluídas no PEPAC 2023-2027, intervención 6613- Axudas a zonas con limitacións naturais ou outras limitacións específicas, subintervención 6613.04 – Prima ZLN.

As axudas relativas ás seguintes intervencións ambientais e climáticas do PEPAC 2023-2027:

- 6501.2. Compromisos agroambientais en superficies agrarias. Compromisos de cultivos sostibles.
- 6501.4. Compromisos agroambientais en superficies agrarias. Apicultura para a biodiversidade.
- 6505.1. Compromisos de conservación de recursos xenéticos.
- 6501.3. Compromisos agroambientais en superficies agrarias. Compromisos de fomento e xestión sustentable de pastos.
- 6503. Compromisos de xestión agroambientais en agricultura ecolóxica.

2. En relación coa xestión e control das intervencións indicadas no artigo 2, é de aplicación directa o disposto na normativa indicada no anexo I.

3. Os procedementos administrativos regulados nesta orde son os seguintes:

a) MR250A. Pagamentos directos á agricultura e á gandaría, e das axudas ao desenvolvemento rural suxeitas ao Sistema integrado de xestión e control (solicitud única).



b) MR239G. Cesión das axudas PAC/DR por cesión de toda a explotación agraria (comunicación).

c) MR239K. Solicitud de modificación do Sistema de información xeográfica de parcelas (Sixpac).

d) MR239O. Recoñecemento como entidade colaboradora.

e) MR239Q. Incorporación de parcelas con utilización agrícola ao rexistro de parcelas non declarables na solicitude única de axudas PAC/DR

f) MR240D. Solicitud de modificación da solicitude única de axudas PAC/DR.

g) MR241C. Solicitud de asignación de dereitos da axuda básica á renda da reserva nacional.

h) MR241D. Comunicación de cesión de dereitos da Axuda básica á renda (ABRS)

*Artigo 2. Axudas directas e axudas ao desenvolvemento rural suxeitas ao sistema integrado de xestión e control*

1. Axudas directas á agricultura e á gandería:

a) Axuda básica á renda para a sustentabilidade.

b) Axuda redistributiva complementaria á renda para a sustentabilidade.

c) Axuda complementaria á renda para persoas agricultoras mozas.

d) Réximes en favor do clima, o ambiente e o benestar animal (ecorreximes) de acordo coas seguintes prácticas:

– Pastoreo extensivo.

– Illas de biodiversidade en superficies de pastos ou sega sustentable.

– Rotación de cultivos con especies mellorantes.

– Sementeira directa.

– Cuberta vexetal espontánea ou sementada.

– Cuberta inerte.

– Establecemento de illas de biodiversidade.

e) Axudas asociadas:

– Axuda asociada para as persoas gandeiras de vacún de carne en extensivo.



- Axuda asociada para o engorde de tenreiros na explotación de nacemento.
- Axuda asociada para o engorde sustentable de tenreiros.
- Axuda asociada para a produción sustentable de leite de vaca.
- Axuda asociada para as persoas gandeiras de ovino e cabrún de carne en extensivo e semiextensivo.
  - Axuda asociada para a produción sustentable de leite de ovella e cabra.
  - Axuda asociada para as persoas gandeiras de ovino e cabrún en extensivo sen pastos, que pastorean restrollos, barbeitos e restos hortofrutícolas.
  - Axuda asociada á produción sustentable de proteínas de orixe vexetal.
  - Axuda asociada ao oliveiral con dificultades específicas e alto valor ambiental.

Todas as axudas citadas anteriormente son financiadas integramente polo FEAGA.

2. As axudas ao desenvolvemento rural suxeitas ao sistema integrado de xestión e control (SIXC) son as seguintes intervencións do Plan estratéxico da PAC 2023-2027:

a) Intervención 6502.1 – Compromisos forestais de xestión, cofinanciada nun 80% co Feader, solicitude de pagamento da seguinte subintervención:

- subintervención 65021.05: Certificación de servizos ecosistémicos\_01.
- subintervención 65021.06: Certificación de servizos ecosistémicos\_02.

b) Intervención 6502.2 – Compromisos de mantemento de forestación e sistemas agroforestais, cofinanciada nun 80% co Fondo Europeo Agrícola de Desenvolvemento Rural (Feader), solicitude de pagamento da seguinte subintervención:

- subintervención 65022.01: Mantemento de forestacións ou repoboacións forestais.

c) Intervención 65012 – Compromisos agroambientais en superficies agrarias.



Compromisos de cultivos sostibles, cofinanciada nun 80 % co Feader, solicitude de pagamento das seguintes subintervencións:

- Subintervención 65012.07: leñosos (correspondente coa 65012.03 na convocatoria da Orde do 15 de marzo de 2023 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (DOG núm. 55, do 20 de marzo).

- Subintervención 65012.04: economía circular. Pequenas explotacións sostibles.

d) Intervención 65013 – Compromisos agroambientais en superficies agrarias. Compromisos de fomento e xestión sustentable de pastos, cofinanciada nun 80 % co Feader, solicitude de pagamento das seguintes subintervencións:

- Subintervención 65013.04: extensificación de prados (correspondente coa 65013.01 na convocatoria da Orde do 15 de marzo de 2023 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (DOG núm. 55, do 20 de marzo).

- Subintervención 65013.05: extensificación de pastos arbustivos e arborados (correspondente coa 65013.02 na convocatoria da Orde do 15 de marzo de 2023 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (DOG núm. 55, do 20 de marzo).

- Subintervención 65013.06: convivencia co lobo (correspondente coa 65013.03: complemento a ganderías extensivas en zonas con presenza de grandes carnívoros na convocatoria da Orde do 15 de marzo de 2023 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e (DOG núm. 55, do 20 de marzo).

e) Intervención 65014 – Compromisos agroambientais en superficies agrarias. Apicultura para a biodiversidade, cofinanciada nun 80 % co Feader, solicitude de pagamento da seguinte subintervención:



- Subintervención 65014.01: apicultura para a biodiversidade.

f) Intervención 6503 – Compromisos de xestión agroambientais en agricultura ecolóxica, cofinanciada nun 80 % co Feader, solicitude de pagamento da seguintes subintervencións:

– Liña: cultivos agrícolas ecolóxicos.

- Subintervención 6503.17: conversión de cultivos agrícolas ecolóxicos.
- Subintervención 6503.18: mantemento de cultivos agrícolas ecolóxicos.

– Liña: viñedos para vinificación ecolóxica:

- Subintervención 6503.19: conversión de viñedo para vinificación ecolóxica.
- Subintervención 6503.20: mantemento de viñedo para vinificación ecolóxica.

– Liña: gandaría ecolóxica:

- Subintervención 6503.21: conversión de gandaría ecolóxica.
- Subintervención 6503.22: mantemento de gandaría ecolóxica.

– Liña: apicultura ecolóxica:

- Subintervención 6503.23: conversión de apicultura ecolóxica.
- Subintervención 6503.24: mantemento de apicultura ecolóxica.

g) Intervención 65051 – Compromisos de conservación de recursos xenéticos cofinanciada nun 80 % co Feader, solicitude de pagamento das seguintes subintervencións:

- Subintervención 65051.01: Fomento de razas autóctonas ameazadas de erosión xenética (SIXC).
- Subintervención 65051.02: variedades en risco de erosión xenética (SIXC).

h) Intervención 6613 – Axudas a zonas con limitacións naturais e outras limitacións específicas, cofinanciadas nun 65% co Feader.



### Artigo 3. *Definicións*

1. Ademais das definicións establecidas na normativa indicada no anexo I, serán de aplicación as seguintes definicións:

a) Razas bovinas de aptitude eminentemente leiteira: consideraranse como tales as seguintes: *Angler Rotvieh (Ageln)-Rød dansk mælkerace (RMD)-German Red-Lithuanian Red, Ayreshire, Armoricaine, Bretonne Pie-noire, Frisoa, Groninger Blaarkop, Guernsey, Jersey. Malkeborhorn, Reggiana, Valdostana nera, Itäsuomenkarja, Länsisuomenkarja, Pohjoissuomenkaja.*

b) Tamén terán esa condición as razas *Fleckvieh, Montebeliard, Parda* e o conxunto mestizo dunha explotación bovina inscrita no Rexistro Xeral de Explotacións Gandeiras (REGA) cunha clasificación zootécnica de «reproducción para a produción de leite».

2. Para os efectos das axudas de desenvolvemento rural reguladas nesta orde, tamén serán aplicables as seguintes definicións:

a) Carga gandeira da explotación: a relación entre o número de unidades de gando maior correspondentes e as superficies de pastos permanentes e herbas e outras forraxes da explotación, incluídas as de aproveitamento comunal ás cales teña dereito.

b) Unidade de gando maior. Para determinar as unidades de gando maior (UGM), utilizarase un valor medio calculado a partir dos censos gandeiros das especies bovino, equino, ovino, caprino e porcino, presentes na explotación, nun día do mes escollido aleatoriamente e en seis datas, entre xaneiro e xuño do ano de solicitude, segundo os sistemas produtivos seguintes:

- Explotacións de bovinos.
- Explotacións extensivas para equinos.
- Explotacións extensivas e mixtas para ovino e cabrún, só con clasificación zootécnica de reprodución para produción de leite, reprodución para produción de carne e reprodución para produción mixta.
- Explotacións extensivas para porcino.



b.1) Segundo o establecido no Anexo V do RD 1048/2022, a táboa de conversión de animais a UGM, será a seguinte:

Bovinos.	De menos de un ano.	0,400
	De un ano a menos de dous anos.	0,700
	Machos, de dous anos ou mais.	1,000
	Xovencas, de dous anos ou mais.	0,800
	Vacas de aptitude láctea, de dous anos ou mais.	1,000
	Outras vacas, de dous anos ou máis.	0,800
Ovinos e cabrúns.		0,100
Equinos.		0,800
Porcinos.	Leitóns > 20 Kg de peso vivo.	0,027
	Porcas de cría > 50 Kg.	0,500
	Outros porcinos.	0,300

b.2) A táboa de conversión de animais a UGM para as axudas de fomento de razas autóctonas ameazadas de erosión xenética será a seguinte, segundo o establecido no anexo do Regulamento de Execución (UE) 2021/2290 da Comisión do 21 de decembro de 2021, polo que se establecen normas sobre os métodos de cálculo dos indicadores comúns de realización e de resultados establecidos no anexo I, Regulamento (UE) 2021/2115, do Parlamento Europeo e do Consello, polo que se establecen normas en relación coa axuda aos plans estratéxicos que deben elaborar os Estados membros no marco da Política Agrícola Común (plans estratéxicos da PAC), financiada con cargo ao Fondo Europeo Agrícola de Garantía (FEAGA) e ao Fondo Europeo Agrícola de Desenvolvemento Rural (Feader), e polo que se derrogan os Regulamentos (UE) nº 1305/2013 e (UE) 1307/2013:

Bovinos.	De menos de seis meses	0,400
	De seis meses a dous anos	0,600



	De dous anos ou mais.	1,000
Ovinos e cabrúns.		0,150
Equinos	Équidos de máis de seis meses	1,000
Porcinos	Porcas de cría >50 Kg.	0,500
	Outros porcos.	0,300
Aves	Galiñas poñedoras	0,014

## CAPÍTULO II

### Disposicións xerais

#### Artigo 4. *Actividade agraria e cumprimento das obrigacións*

1. As persoas solicitantes deben declarar de forma expresa e veraz na súa solicitude que os cultivos e aproveitamentos, así como as actividades de mantemento declaradas, constitúen un fiel reflexo da súa actividade agraria. Se, con motivo dun control, se comprobara que non se realizaron os cultivos ou aproveitamentos ou as actividades de mantemento, con declaración falsa, inexacta ou negligente e que, ademais, a dita falta de concordancia condicionou o cumprimento dos requisitos sobre a actividade agraria, poderase considerar que se trata dun caso de creación de condicións artificiais para obter o beneficio das axudas e estarán suxeitas ás penalizacións correspondentes.

2. Para determinar a existencia de pastoreo terase en conta a carga gandeira exixida na axuda e indicios de actividade gandeira como vexetación transitada e camiños feitos polo gando, mato comido, dexecións, peches, comedeiros, bebedoiros, mangada de manexo ou outras instalacións.

Poderá considerarse que unha superficie de pasto está abandonada cando se determine que, pola densidade de vexetación, non é posible o tránsito de animais.



3. Nos recintos en que se declare unha actividade de mantemento nos pastos permanentes, a dita actividade realizarase anualmente e deberase conservar á disposición do Fogga, se é o caso, toda a documentación xustificativa dos gastos e pagamentos incorridos na súa realización.

4. No caso dos pastos de uso en común en recintos ficticios aos que se fai referencia no artigo 5, non se admitirán as actividades de mantemento. Só está permitida a actividade de pastoreo con animais da propia explotación do solicitante.

5. As persoas solicitantes declararán responsablemente que están ao día no cumprimento das obrigas tributarias ou fronte á Seguridade Social, así como que non teñen pendente de pagamento ningunha outra débeda coa Administración pública da Comunidade Autónoma. Esa declaración producirá efectos para a obtención da condición de persoa beneficiaria e para a realización dos pagamentos das axudas.

Calquera variación no cumprimento das obrigas tributarias ou fronte á Seguridade Social ou de non ter débeda coa Administración pública da Comunidade Autónoma, posterior á data de presentación da solicitude, deberá ser notificada pola persoa solicitante ao Fogga no prazo máximo de dez días desde a data desa variación, empregando o procedemento xenérico PR004A accesible na sede electrónica da Xunta de Galicia na ligazón <https://sede.xunta.gal/>.

A inexactitude, erro, falsidade ou non notificación da declaración responsable ou a non notificación do cambio das circunstancias recollidas na declaración responsable poderá dar lugar á tramitación dun procedemento de reintegro, perda de dereito e/ou procedemento sancionador e a esixencia das demais responsabilidades que poidan derivar da normativa vixente en materia de subvencións e de loita contra a fraude en materia de axudas públicas e subvencións.

*Artigo 5. Declaración de pastos permanentes utilizados en común que se declaren en recintos ficticios*

1. As superficies de pastos permanentes utilizados en común poden declararse mediante referencias identificativas das parcelas agrícolas distintas das establecidas no Sixpac, que o Fogga poñerá en coñecemento das entidades xestoras dos



pastos antes de que finalice o período de presentación da solicitude única, para os efectos de que poidan ser utilizadas polas persoas agricultoras na declaración de superficies. A persoa gandeira declarará a superficie neta que lle foi asignada pola entidade xestora do pasto, é dicir, a superficie subvencionable unha vez aplicado o coeficiente de subvencionabilidade dos pastos que corresponda.

2. As entidades xestoras dos pastos de uso en común deberán presentar unha declaración gráfica na que delimiten as superficies correspondentes aos pastos declarados en común dentro dos recintos reais que compoñen a superficie total do comunal.

3. O dereito de uso dos pastos en común será comprobado polo Fogga nos rexistros correspondentes.

#### *Artigo 6. Condicionalidade reforzada e condicionalidade social*

1. As intervencións do Plan Estratéxico da PAC 2023-2027 indicadas no artigo 2, deberán observar as obrigas e requisitos da condicionalidade reforzada e da condicionalidade social definidas, respectivamente, nos títulos I e II do Real decreto 1049/2022.

2. A Orde do 12 de febreiro de 2025 pola que se definen as penalizacións por incumprimento dos requisitos de admisibilidade e compromisos das axudas relativas ás intervencións ambientais e climáticas, das obrigas da condicionalidade reforzada do Plan estratéxico da PAC 2023-2027 e pola que se establecen os organismos de control da condicionalidade reforzada recolle as obrigas concretas de condicionalidade reforzada, así como os criterios da avaliación da gravidade, alcance e persistencia no caso de incumprimento destas, as obrigas aplicables na condicionalidade social e os seus organismos de control.

#### *Artigo 7. Flexibilidades na xestión das intervencións do Plan Estratéxico da PAC 2023-2027*

1. Con respecto ás prácticas dos ecorreximes nas axudas directas:



– Pastoreo extensivo: redúcese a 90 días o período mínimo non continuo de pastoreo. O pastoreo de todas as parcelas rexistrarase no caderno de explotación indicado na web do Fogga: <https://fogga.xunta.gal/gl/pac/guias-persona-usuaria>.

– Sega sustentable: defínense 2 períodos de non aproveitamento das superficies de pastos permanentes ou temporais obxecto de sega, durante os cales non se poderá realizar ningunha actividade nestas superficies de, polo menos, 60 días consecutivos:

- Primeiro período: do 2 de maio ao 30 de xuño.
- Segundo período: do 3 xullo ao 31 de agosto.

A persoa beneficiaria poderá elixir a cal dos períodos anteriores se acolle.

– Illas de biodiversidade en superficies de pastos: nas parcelas onde se establece o 4% de superficie sen segar non se poderá realizar actividade agraria ningunha dende o 1 de xaneiro ata o 31 de agosto do ano de solicitude. Para manter a superficie en boas condicións agrarias a partir do 31 de agosto a actividade principal de mantemento será a sega, que deberá declararse na solicitude única.

– Cubertas vexetais espontáneas ou sementadas: establécese un período obrigatorio de 4 meses que vai do 1 de decembro de 2025 ao 31 de marzo de 2026 en que a cuberta vexetal debe permanecer viva.

2. Con respecto ás axudas asociadas, establécese que poderán ser persoas beneficiarias das axudas asociadas para as explotacións de ovino e/ou para as explotacións de cabrún, as persoas titulares de explotacións que contén cun censo de femias elixibles igual ou superior a 10.

3. Con respecto á condicionalidade reforzada:

– Na BCAM 4 establécese que o ancho mínimo das franxas de protección dos leitos sexa de 5 metros, excepto no caso das canles de rega, en que poderá ser de 1 metro.



– Na BCAM 5 exceptúanse da prohibición de realizar labores verticais (sen volteo) na dirección da máxima pendente as seguintes superficies:

- a) As parcelas de cultivos herbáceos e leñosos cunha superficie igual ou inferior a unha hectárea, así como as parcelas de cultivos leñosos irregulares ou alongadas cuxa dimensión mínima no sentido transversal á pendente sexa inferior a 100 metros en calquera punto da parcela.
- b) As plantacións de cultivos leñosos que estivesen implantadas antes do 1 de xaneiro de 2023, cuxo marco de plantación non permita labrar transversalmente á dirección de máxima pendente cando esta sexa igual ou maior do 10 %:
- c) Con carácter xeral, as plantacións de viñedo localizadas nos municipios que figuran na relación contida no documento Excepción BCAM 5, accesible na web do Fogga: <https://fogga.xunta.gal/gl/pac/campana-actual>
- d) Tamén poderán ser exceptuadas da citada prohibición as superficies de viñedo localizadas nos municipios que non se atopen na dita relación, ou as superficies doutros cultivos leñosos, obrigadas a cumprir coa BCAM 5, cuxas persoas titulares soliciten unha autorización individual ao Fogga.

– No que respecta á BCAM 7, o período no cal se levará a cabo a verificación do número de cultivos e o cálculo das súas correspondentes porcentaxes, en función das características agroclimáticas e das prácticas tradicionais na rexión irá do 15 de xaneiro ao 30 de abril, de maneira que os cultivos declarados atópanse no terreo durante a maior parte dese período.

#### Artigo 8. *Fotografías xeorreferenciadas*

1. As persoas solicitantes que presenten solicitudes de modificación do Sixpac, coas excepcións dos tipos 2 e 4 (cambios no sistema de explotación secaño/regadío en recintos completos ou en partes destes) e as alegacións que non modifiquen a subvencionabilidade no recinto, deberán achegar, para acreditar os cambios



solicitados, un mínimo de dúas fotografías datadas e xeorreferenciadas por cada un dos recintos, indicando sobre a saída gráfica do visor o punto e a dirección con que foron tomadas.

Non obstante, no caso de recintos contiguos coa mesma utilización que, no seu conxunto, superen as 5 hectáreas, ou cando a parcelación sexa tan elevada que se excedan os 20 recintos por hectárea, poderá presentarse un número de fotos inferior ao esixido, sempre que se reflecta adecuadamente a realidade do terreo.

2. As persoas solicitantes que presenten solicitudes de axuda de produción sustentable de proteínas de orixe vexetal durante o período principal de cultivo (do 15 de xaneiro ao 30 de abril) e solicitude de axudas en recintos con cultivos baixo plástico, deberán achegar un mínimo de dúas fotografías datadas e xeorreferenciadas por recinto, indicando sobre a saída gráfica do visor o punto e a dirección con que foron tomadas.

Así mesmo, no caso que sexa requirida pola Administración para xustificar a admisibilidade dunha axuda, a persoa solicitante deberá achegar as fotografías solicitadas.

3. A presentación das fotografías constitúe documentación mínima imprescindible para a admisión dos recintos das solicitudes indicadas nos puntos 1 e 2. A non presentación das fotografías suporá que os recintos non se considerarán admisibles para as axudas solicitadas.

4. As fotografías deberán cumprir coas especificacións técnicas e a calidade indicadas no anexo XXV do Real decreto 1048/2022 e deberán realizarse preferentemente coa aplicación para o móbil Sga@pp. Na web do Fogga está dispoñible unha guía coas directrices para a realización de fotografías xeorreferenciadas:

<https://fogga.xunta.gal/gl/pac/guias-persona-usuaria>

#### Artigo 9. *Penalizacións e intencionalidade*

1. Será de aplicación o establecido na Orde do 12 de febreiro de 2025 pola que



se definen as penalizacións por incumprimento dos requisitos de admisibilidade e compromisos das axudas relativas ás intervencións ambientais e climáticas, das obrigas da condicionalidade reforzada do Plan estratéxico da PAC 2023-2027, e pola que se establecen os organismos de control da condicionalidade reforzada.

2. Con base no establecido no artigo 3 do Real decreto 1047/2022, do 27 de decembro, polo que se regula o sistema de xestión e control das intervencións do Plan estratéxico 2023-2027 e outras axudas da política agrícola común, adicionalmente, poderán ser consideradas como creación de condicións artificiais para acceder ás axudas o aproveitamento gandeiro en parcelas de pastos non incluídas na solicitude única que estean afectadas por incendios forestais desde a data deste ata o 31 de decembro dos dous anos seguintes, salvo casos autorizados polo artigo 50 do Decreto 73/2020.

### CAPÍTULO III

#### **Entidades colaboradoras**

##### *Artigo 10. Entidades colaboradoras*

Poderán acceder á condición de entidade colaboradora recoñecida polo Fogga na presentación e modificación da solicitude única, así como doutras solicitudes relacionadas con ela que tamén se regulan nesta orde:

1. As entidades de crédito (bancos ou caixas de aforro) que teñan sucursais abertas ao público na Comunidade Autónoma de Galicia.
2. As organizacións profesionais agrarias con implantación na Comunidade Autónoma.
3. As entidades de asesoramento inscritas no Rexistro de Entidades con Servizos de Asesoramento ou Xestión de Galicia (Resaxega) con data do 31 de xaneiro de 2026.



## Artigo 11. *Requisitos das entidades colaboradoras*

1. As entidades solicitantes deberán reunir os seguintes requisitos:

- a) Dispoñer de persoal cualificado e suficiente para prestar o asesoramento no ámbito da solicitude única de axudas da PAC e doutras solicitudes relacionadas con ela, desde o inicio do prazo de presentación ata o final do prazo de modificación da solicitude única ante posibles cambios tras os controis por monitorización.
- b) Dispoñer de medios para o tratamento informático das solicitudes a través do programa de captura facilitado polo Fogga.
- c) Dispoñer de certificado dixital de usuario da entidade con sinatura electrónica avanzada para a realización do rexistro electrónico das solicitudes presentadas a través da dita entidade.
- d) Cumprir o disposto no artigo 10.2 e 10.3 da Lei 9/2007, do 13 de xuño, de subvencións de Galicia.

2. Os citados requisitos acreditaranse mediante declaración responsable.

## Artigo 12. *Solicitude, prazo de presentación e resolución do recoñecemento como entidade colaboradora (código de procedemento MR2390)*

1. As entidades interesadas en adquirir a condición de colaboradoras deberán dirixir a súa solicitude, segundo o modelo do anexo II, á persoa titular da Dirección do Fogga.

2. Esta solicitude presentarase obrigatoriamente por medios electrónicos a través do formulario normalizado dispoñible na sede electrónica da Xunta de Galicia, <https://sede.xunta.gal> (código de procedemento MR2390).

De conformidade co artigo 68.4 da Lei 39/2015, do 1 de outubro, se algunha das persoas interesadas presenta a súa solicitude presencialmente, será requirida



para que a emende a través da súa presentación electrónica. Para estes efectos, considerarase como data de presentación da solicitude aquela en que sexa realizada a emenda.

Para a presentación electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

3. O prazo para a presentación das solicitudes será dun mes desde o día seguinte ao da publicación desta orde no Diario Oficial de Galicia.

4. Neste procedemento os trámites administrativos posteriores ao de presentación das solicitudes deberán ser realizados a través da Carpeta cidadá dispoñible na sede electrónica da Xunta de Galicia (<https://sede.xunta.gal>).

5. A persoa titular da Dirección do Fogga será a competente para resolver as solicitudes.

6. O prazo máximo para ditar as resolucións das solicitudes previstas neste artigo será de 3 meses contados desde a data en que a solicitude tivese entrada no rexistro electrónico da Xunta. Transcorrido o devandito prazo sen que se dite e notifique a correspondente resolución, a persoa interesada poderá entender estimada a súa solicitude por silencio administrativo.

7. As notificacións de resolucións e actos administrativos efectuaranse só por medios electrónicos, nos termos previstos na normativa reguladora do procedemento administrativo común.

8. De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practícaranse mediante a comparecencia na sede electrónica da Xunta de Galicia e a través do Sistema de notificacións electrónicas de Galicia - Notifica.gal. Este sistema enviará ás persoas interesadas avisos da posta á disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso,



efectos de notificación practicada e a súa falta non impedirá que a notificación sexa considerada plenamente válida.

9. De conformidade co artigo 47 da Lei 4/2019, do 17 de xullo, de administración dixital de Galicia, as persoas interesadas deberán crear e manter o seu enderezo electrónico habilitado único a través do Sistema de notificacións electrónicas de Galicia - Notifica.gal, para todos os procedementos administrativos tramitados pola Administración xeral e as entidades instrumentais do sector público autonómico. En todo caso, a Administración xeral e as entidades do sector público autonómico de Galicia poderán de oficio crear o indicado enderezo, para os efectos de asegurar o cumprimento polas persoas interesadas da súa obriga de relacionarse por medios electrónicos.

10. As notificacións entenderanse practicadas no momento en que se produza o acceso ao seu contido, entendéndose rexeitada cando transcorresen dez días naturais desde a posta á disposición da notificación sen que se acceda ao seu contido.

11. Se o envío da notificación electrónica non é posible por problemas técnicos practicarase a notificación polos medios previstos na normativa reguladora do procedemento administrativo común.

12. As resolucións das solicitudes recollidas neste artigo non poñen fin á vía administrativa e, de conformidade co artigo 121 e seguintes da Lei 39/2015, do 1 de outubro, do procedemento administrativo común das administracións públicas, poderán ser impugnadas en alzada ante a persoa titular da Presidencia do Fogga, no prazo dun mes.

13. No caso de existir un convenio vixente non é necesario solicitar este procedemento.



### Artigo 13. *Convenio de entidade colaboradora*

1. A persoa titular da Dirección do Fogga e a persoa representante da entidade colaboradora formalizarán o convenio de entidade colaboradora.
2. O convenio de entidade colaboradora terá o contido previsto no artigo 13 da Lei 9/2007, do 13 de xuño, de subvencións de Galicia, e quedará automaticamente revogado cando se produzan cambios normativos que afecten substancialmente as disposicións vixentes no momento da súa sinatura.

### Artigo 14. *Habilitación para a presentación das solicitudes en representación de terceiros*

1. A formalización do convenio comportará a habilitación para a presentación na Comunidade Autónoma de Galicia da solicitude única de axudas da PAC e doutras solicitudes relacionadas con ela que tamén se regulan nesta orde, en representación de terceiros por medios telemáticos.
2. As entidades colaboradoras deberán ter a representación necesaria nos termos establecidos no artigo 5 da Lei 39/2015, do 1 de outubro, do procedemento administrativo común das administracións públicas.
3. O Fogga poderá requirir en calquera momento ás entidades habilitadas a acreditación da representación que desempeñen. A falta de representación suficiente das persoas en cuxo nome se presentase a documentación dará lugar á existencia das responsabilidades pertinentes.
4. A habilitación só confire á entidade autorizada a representación para intervir na presentación da solicitude da campaña en curso a través da aplicación informática SGA.
5. De acordo co anterior, a persoa solicitante será a única responsable do contido das súas solicitudes.
6. Na web do Fogga publicarase para cada campaña a relación das entidades colaboradoras recoñecidas: <https://fogga.xunta.gal/gl/pac/campana-actual>



## TÍTULO II

### Dos procedementos

#### CAPÍTULO I

#### Tramitación dos procedementos

##### Artigo 15. *Órganos competentes*

A subdirección Xeral de Xestión da PAC do Fogga será o órgano competente para a instrución dos procedementos indicados no artigo 1 e correspóndelle á persoa titular da Dirección do Fogga ditar as correspondentes resolucións, coa excepción das subintervencións 6502.1 e 6502.2, contempladas no artigo 2.2 e incluídas no procedemento MR250A, onde a Subdirección Xeral de Recursos Forestais é o órgano de instrución e a persoa titular da Dirección Xeral de Planificación e Ordenación Forestal é a competente para ditar as correspondentes resolucións por delegación da persoa titular da Consellería do Medio Rural.

##### Artigo 16. *Solicitud única (código de procedemento MR250A)*

1. As persoas que desexen obter algunha/algunhas das intervencións citadas no artigo 2 deberán presentar unha solicitude única.
2. A solicitude única presentarse na Comunidade Autónoma de Galicia, dirixida á persoa titular da Dirección do Fogga, cando:
  - a) A explotación estea situada completamente na Comunidade Autónoma de Galicia.
  - b) A explotación estea situada en máis dunha comunidade autónoma e a maior parte da superficie agraria ou o maior número de animais (no caso de non dispoñer de superficie), se encontra na Comunidade Autónoma de Galicia.
3. A presentación da solicitude única realizarase electronicamente mediante a aplicación SGA: <https://sgapac.xunta.es/>
4. As persoas solicitantes poderán optar por:



a) Realizar persoalmente a súa solicitude, para o cal precisan dispoñer dun certificado dixital con vixencia.

b) Realizar a solicitude a través das entidades colaboradoras asinantes dun convenio para tal efecto co Fogga.

5. O prazo de presentación da solicitude única iniciarase o día seguinte ao da publicación desta orde no *Diario Oficial de Galicia* e finalizará o día 30 de abril de 2026, ambos incluídos. Non obstante, admitiranse solicitudes ata a data de finalización do prazo de modificación da solicitude única de acordo coas condicións establecidas no artigo 108.3 do Real decreto 1048/2022.

6. O prazo de retirada da solicitude única finaliza o 15 de setembro de 2026. Non se poderá retirar a solicitude nos casos indicados no artigo 113.3 do Real decreto 1048/2022.

7. De xeito excepcional, para o ano natural 2026, utilizaranse obrigatoriamente as referencias oficiais identificativas de concentración parcelaria nas zonas indicadas no documento "Zonas de concentración parcelaria sen referencias SIXPAC" da web do Fogga: <https://fogga.xunta.gal/gl/pac/campana-actual>

#### Artigo 17. *Modificación da solicitude única (código de procedemento MR240D)*

1. Unha vez finalizado o prazo para a presentación da solicitude única, as persoas solicitantes poderán modificar a solicitude ata o 31 de maio de 2026, incluído.

2. As solicitudes de modificación deberán presentarse conforme o indicado no artigo 23.

3. A modificación da solicitude única no caso de expedientes con control por monitorización terá en conta a clasificación das parcelas en tres cores distintas, co seguinte significado:

a) Cor verde: coincidencia entre o declarado pola persoa solicitante na súa solicitude e o identificado polo sistema de monitorización.

b) Cor amarela: existe dúbida sobre a coincidencia entre o declarado pola persoa solicitante na súa solicitude e o identificado polo sistema de monitorización.



c) Cor vermella: falta de coincidencia entre o declarado pola persoa solicitante na súa solicitude e o identificado polo sistema de monitorización.

A información sobre as parcelas clasificadas coas cores amarela e vermella estarán á disposición das persoas solicitantes no Portal de axudas PAC na web do Fogga (<https://sgapac.xunta.es/SgaGpi/inicio/inicioAplicacion.action?continue>), así como a través da aplicación móbil Sga@pp.

Estas parcelas, así como aquelas afectadas polos controis preliminares, poderán ser obxecto de adaptación da solicitude ata o 15 de setembro de 2026. Finalizado o dito prazo emitirase un informe de control para os expedientes suxeitos a monitorización. O dito informe notificarase conforme o indicado no artigo 27. As persoas interesadas disporán dun prazo de 10 días a partir do día seguinte ao da notificación do informe de control para formularen as alegacións ou presentaren os documentos que xulguen pertinentes, consonte o que dispón o artigo 73 da Lei 39/2015, do 1 de outubro, do procedemento administrativo común das administracións públicas.

#### *Artigo 18. Alegacións ao Sixpac (código de procedemento MR239K)*

1. No caso de que a información recollida no Sixpac non coincida coa realidade da súa explotación, as persoas interesadas deberán presentar as alegacións para a modificación que correspondan sobre o uso, a delimitación ou outra información existente no Sixpac, conforme se indica no anexo V. É responsabilidade das persoas interesadas comprobar que a información contida no Sixpac referida aos recintos que compoñen as súas parcelas agrícolas é correcta; en concreto, deberán comprobar que a delimitación gráfica e o uso asignado aos seus recintos é correcto. Así mesmo, deberán asegurarse de que os seus recintos non conteñen elementos non subvencionables, en particular, camiños e edificacións.

2. No caso de que unha mesma persoa agricultora presente varias alegacións sobre un mesmo recinto, para o estudo delas só se considerará a última presentada.



3. Non se admitirán alegacións que comporten a partición dun recinto por unha superficie menor de 100 m<sup>2</sup>.

4. No que se refire ás alegacións ao coeficiente de subvencionabilidade de pastos (CSP) en Galicia, as persoas solicitantes da solicitude única poderán propoñer modificacións ao CSP global, sen distinguir os factores que o compoñen (solo, pendente ou vexetación). As persoas interesadas poderán diferenciar sectores dun mesmo recinto nos cales estimen un grao de subvencionabilidade substancialmente diferente, pero só se admitirán as solicitudes para incrementar o CSP global cando o incremento proposto sexa superior ao 20 % ou cando o CSP final sexa 100. O novo valor proposto na alegación deberá ser algún dos seguintes: 25, 35, 45, 55, 65, 75, 85 ou 100. No caso de propoñer un valor distinto, axustarase de oficio á baixa, e serán aplicables as reducións e sancións correspondentes por sobredeclaración de superficies.

Non se considerarán pastos arbustivos ou con arboredo os límites dos recintos (particularmente os de terras de cultivo, pasteiros ou cultivos permanentes) nin tampouco recintos ou partes de recintos inferiores a 0,30 ha, agás que estean unidos a outras superficies de pasto da explotación con actividade de pastoreo e que, en conxunto, superen ese límite.

5. Todo recinto inactivo que sexa declarado nesta campaña, ou calquera cambio nun recinto de uso non agrícola a un uso agrícola deberá facerse presentando unha alegación ao Sixpac e acreditar o dereito de uso do recinto cando a súa superficie sexa maior de 1 ha. En calquera caso, para evitar a creación de condicións artificiais poderase pedir documentación acreditativa do dereito de uso en calquera parcela.

6. Os cambios que afecten o uso forestal constatados polo Fogga serán comunicados á unidade competente de acordo cos artigos 60 a 62 da Lei 7/2012, do 28 de xuño, de montes de Galicia.

7. As solicitudes de modificación do Sixpac dos recintos situados na Comunidade Autónoma de Galicia dirixiranse á persoa titular da Dirección do Fogga.



8. O prazo de presentación iniciarase na data de comezo do prazo para a presentación da solicitude única e rematará o 31 de outubro de 2026. Non obstante, para que as resolucións teñan efecto sobre as superficies declaradas na solicitude única do ano 2026, o prazo rematará co fin do prazo de modificación da solicitude única.

9. As solicitudes de modificación do Sixpac deberán presentarse conforme o indicado no artigo 23.

*Artigo 19. Solicitude de dereitos de axuda básica á renda da reserva nacional (código de procedemento MR241C)*

1. As solicitudes de dereitos de axuda básica á renda da reserva nacional na Comunidade Autónoma de Galicia presentaranse conforme ao indicado no artigo 23 ante a persoa titular da Dirección do Fogga.

2. O prazo de presentación será o mesmo que o da solicitude única.

*Artigo 20. Cesións de dereitos de axuda básica á renda (código de procedemento MR241D)*

1. A persoa cedente de dereitos de axuda básica á renda comunicará á persoa titular da Dirección do Fogga a cesión dos dereitos de axuda básica á renda sempre e cando a súa última solicitude única a presentase na Comunidade Autónoma de Galicia.

2. O prazo para realizar esta comunicación iniciarase o mesmo día no que se inicie o prazo de presentación da solicitude única e rematará o mesmo día no que remate o prazo de modificación da solicitude única.

3. A presentación destas comunicacións realizarase conforme o indicado no artigo 23.



Artigo 21. *Cesión das axudas por cesión da explotación agraria (código de procedemento MR239G)*

1. No caso de cesión de explotación, as axudas solicitadas pola persoa cedente concederanse á persoa cesionaria sempre:

a) Que a persoa cedente presente, despois da data de fin do prazo de modificación da solicitude única e ata o 15 de setembro de 2026 incluído, unha comunicación, segundo o modelo do anexo III, dirixida á persoa titular da Dirección do Fogga.

Esta comunicación presentarse obrigatoriamente a través do formulario normalizado dispoñible na sede electrónica da Xunta de Galicia: <https://sede.xunta.gal> (código de procedemento MR239G).

Para a presentación electrónica desta comunicación poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

b) Que se cumpran todas as condicións para a concesión e/ou pagamento da axuda respecto da explotación cedida.

2. Unha vez que a persoa cedente faga a comunicación indicada ao Fogga e a persoa cesionaria solicite o pagamento das axudas para ser beneficiaria produciranse os seguintes efectos:

a) Todos os dereitos e obrigas da persoa cedente que deriven da relación xurídica xerada pola solicitude de axuda ou a solicitude de pagamento entre a dita persoa cedente e a autoridade competente transferiranse á persoa cesionaria.

b) Especificamente, no caso das axudas relativas ás intervencións ambientais e climáticas do PEPAC, todos os compromisos adquiridos pola persoa cedente serán transferidos á persoa cesionaria, que se subrogará nas obrigas relacionadas co seu cumprimento.



c) Todas as actuacións necesarias para a concesión da axuda e todas as declaracións realizadas pola persoa cedente antes da cesión asignaranse á persoa cesionaria para os efectos da aplicación da normativa pertinente da Unión Europea.

3. No caso das axudas relativas ás intervencións ambientais e climáticas do PEPAC, a concesión da axuda á persoa beneficiaria estará supeditada á transferencia e á comprobación dos compromisos da explotación.

4. En ningún caso serán de aplicación as disposicións sinaladas neste artigo cando a transferencia só afecte a unha parte da explotación.

5. Xunto coa comunicación a persoa cedente deberá presentar:

– Documento de cambio de titularidade da ou das explotacións cedidas á persoa cesionaria conforme o regulado polo procedemento MR408C.

– Acordo de cesión asinado entre as persoas cedente e cesionaria segundo o modelo do anexo III-A.

– Documento de autorización de sinatura, de ser o caso.

6. A documentación complementaria deberá presentarse electronicamente.

Se algunha das persoas interesadas presenta a documentación complementaria presencialmente, requiriráselle para que a emende a través da súa presentación electrónica. Para estes efectos, considerarase como data de presentación aquela na que fose realizada a emenda.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o exixa ou existan dúbidas derivadas da calidade da copia, a Administración poderá solicitar de maneira motivada o cotexo das copias achegadas pola persoa interesada, para o que poderán requirir a exhibición do documento ou da información orixinal.



7. Os trámites administrativos posteriores ao de presentación da comunicación deberán ser realizados a través da Carpeta cidadá dispoñible na sede electrónica da Xunta de Galicia, <https://sede.xunta.gal>

*Artigo 22. Incorporación de parcelas con utilización agrícola ao rexistro de parcelas non declarables na solicitude única de axudas da PAC e posterior desbloqueo das mesmas (código de procedemento MR239Q)*

1. As persoas físicas ou xurídicas titulares de parcelas con utilización agrícola que non presenten a solicitude única de axudas da PAC na campaña 2026, poden solicitar ao Fogga, en calquera momento do ano, a incorporación das ditas parcelas ao rexistro de parcelas non declarables.

2. As solicitudes presentaranse preferentemente por vía electrónica a través do formulario normalizado do procedemento MR239Q que se inclúe como modelo no anexo IV, dispoñible na sede electrónica da Xunta de Galicia, <https://sede.xunta.gal>. A presentación electrónica será obrigatoria para: as Administracións públicas, as persoas xurídicas, as entidades sen personalidade xurídica, e as persoas representantes dunha das anteriores.

De conformidade co artigo 68.4 da Lei 39/2015, do 1 de outubro, do procedemento administrativo común das Administracións Públicas, se algunha das persoas interesadas obrigadas á presentación electrónica presenta a súa solicitude presencialmente, requiriráselle para que a emende a través da súa presentación electrónica. Para estes efectos, considerarase como data de presentación da solicitude aquela na que fose realizada a emenda.

Para a presentación electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

Aquelas persoas interesadas non obrigadas á presentación electrónica, opcionalmente, poderán presentar as solicitudes presencialmente en calquera dos lugares e rexistros establecidos na normativa reguladora do procedemento



administrativo común, utilizando o formulario normalizado do procedemento MR239Q que se inclúe como modelo no anexo IV, dispoñible na sede electrónica da Xunta de Galicia, <https://sede.xunta.gal>

3. Para a tramitación do procedemento MR239Q consultarase automaticamente os datos incluídos nos seguintes documentos en poder da Administración actuante ou elaborados polas administracións públicas, agás que a persoa interesada se opoña á súa consulta:

- DNI ou NIE da persoa solicitante.
- DNI ou NIE da persoa representante da persoa solicitante, de ser o caso.

Ademais, poderanse consultar:

- NIF da persoa solicitante.
- NIF da persoa representante da persoa solicitante, de ser o caso.
- Titularidade catastral das parcelas con utilización agrícola.

4. No caso de que as persoas interesadas se opoñan á consulta, deberán indicalo nas solicitudes e achegar os documentos correspondentes. Cando así o exixa a normativa aplicable solicitarase o consentimento expreso da persoa interesada para realizar a consulta.

Excepcionalmente, no caso de que algunha circunstancia imposibilite a obtención da información, poderáselle requirir á persoa solicitante a presentación dos documentos correspondentes ou a documentación complementaria.

5. As persoas solicitantes ou as persoas representantes deberán acreditar a posesión de cada unha das parcelas agrícolas incluídas na solicitude; a tal fin deberán achegar, conforme se indica no anexo IV, algún dos seguintes documentos:

- Nota rexistral do Rexistro da propiedade
- Título de propiedade
- Documentación relativa ao tracto sucesorio (Últimas vontades, testamento ou declaración de herdeiros e aceptación de herdanza).



- Outro documento de acreditación da propiedade válido en dereito a especificar.
- Documento de autorización de sinatura no caso de que a persoa solicitante non sexa a que asina a solicitude.

6. A documentación complementaria presentarase preferiblemente por vía electrónica. A presentación electrónica será obrigatoria para os suxeitos obrigados á presentación electrónica da solicitude. Se algunha destas persoas presenta a documentación complementaria presencialmente, requiriráselle para que a emende a través da súa presentación electrónica. Para estes efectos, considerarase como data de presentación aquela na que fose realizada a emenda.

Aquelas persoas non obrigadas á presentación electrónica, opcionalmente, poderán presentar a documentación complementaria presencialmente en calquera dos lugares e rexistros establecidos na normativa reguladora do procedemento administrativo común.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o exixa ou existan dúbidas derivadas da calidade da copia, a Administración poderá solicitar de maneira motivada o cotexo das copias achegadas pola persoa interesada, para o que poderán requirir a exhibición do documento ou da información orixinal.

7. Os trámites administrativos posteriores ao de presentación da solicitude deberán ser realizados a través da Carpeta cidadá dispoñible na sede electrónica da Xunta de Galicia, <https://sede.xunta.gal>

8. As notificacións deste procedemento practicaranse preferentemente por medios electrónicos e, en todo caso, cando as persoas interesadas resulten obrigadas a recibilas por esta vía. As persoas interesadas que non estean obrigadas a recibir notificacións electrónicas poderán decidir e comunicar en calquera momento que as notificacións sucesivas se practiquen ou deixen de practicar por medios electrónicos.



9. A persoa interesada deberá manifestar expresamente a modalidade escollida para a notificación (electrónica ou en papel) no formulario. No caso de optar pola notificación en papel practicarase a notificación segundo o establecido na normativa reguladora do procedemento administrativo común.

10. De conformidade co artigo 45.2 da Lei 4/2019, do 17 de xuño, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia a través do sistema de notificacións electrónicas de Galicia Notifica.gal. Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida. No caso de persoas interesadas obrigadas a recibir notificacións so por medios electrónicos deberán optar en todo caso, no formulario, pola notificación por medios electrónicos, sen que sexa válida, nin produza efectos no procedemento, unha opción diferente.

11. As notificacións por medios electrónicos entenderanse practicadas no momento no que se produza o acceso ao seu contido. Cando a notificación por medios electrónicos sexa de carácter obrigatorio, ou fose expresamente elixida pola persoa interesada, entenderase rexeitada cando transcorresen dez días naturais desde a posta a disposición da notificación sen que se acceda ao seu contido.

12. Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

13. Se posteriormente unha persoa agricultora desexa incluír na súa solicitude única de axudas da PAC parcelas incorporadas no ficheiro de parcelas non declarables, deberá incluílas na súa solicitude única e achegar, antes da finalización do prazo de modificación da mesma, un documento de autorización da persoa titular das ditas parcelas no que conste expresamente a identificación das parcelas con utilización agrícola, a campaña ou campañas para a que é válida a autorización, e a copia do DNI/NIF da persoa titular ou, alternativamente, calquera outro documen-



to admisible en dereito xustificativo da autorización para a utilización das ditas parcelas.

#### Artigo 23. *Emprego de medios electrónicos e consulta das solicitudes*

1. Para os procedementos MR250A, MR240D, MR239K, MR241C e MR241D as solicitudes presentaranse por medios electrónicos a través da aplicación informática SGA: <https://sgapac.xunta.es/>

Todos os trámites posteriores destes procedementos que as persoas interesadas deban realizar deberán ser efectuados electronicamente a través do Portal de axudas PAC: <https://portal-axudaspac.xunta.gal>

No caso de que non exista expediente electrónico na aplicación informática SGA, para o procedemento MR241D utilizarase o procedemento xenérico PR004A accesible na ligazón <https://sede.xunta.gal>

2. Para a consulta e a xestión das solicitudes, as persoas interesadas poderán utilizar as seguintes ferramentas electrónicas:

- Aplicación para teléfono móbil Sga@pp, que permite a consulta de solicitudes da PAC e alegacións ao Sixpac. Esta aplicación xa inclúe a funcionalidade precisa para a obtención das fotografías xeorreferenciadas.
  - Portal de axudas PAC, que permite achegar información e realizar alegacións na solicitude da PAC: <https://portal-ayudaspac.xunta.gal>
  - Páxina web do FEGA, para coñecer o número e valor dos dereitos de axuda básica á renda: <https://www.fega.gob.es/es>

#### Artigo 24. *Comprobación de datos*

1. A tramitación dos procedementos regulados nesta orde require a incorporación de datos en poder das administracións públicas, consellos reguladores, marcas de calidade, organismos de control, entidades asociativas ou entidades de asesoramento. De conformidade co disposto no artigo 28 da Lei 39/2015, do 1 de outubro,



do Procedemento Administrativo Común das Administracións Públicas, poderase consultar información das persoas solicitantes.

2. Para os procedementos MR250A, MR240D, MR239K, MR241C e MR241D consultarase automaticamente a seguinte información:

- NIF da entidade solicitante. DNI ou NIE se o solicitante é persoa física.
- DNI ou NIE da persoa representante, de ser o caso.
- Certificado acreditativo de estar ao día nas obrigas tributarias co Estado, emitido pola Axencia Estatal de Administración Tributaria (AEAT).
- Certificado acreditativo de estar ao día nas obrigas coa Seguridade Social.
- Certificado acreditativo de estar ao día nas obrigas tributarias coa Comunidade Autónoma, emitido pola Axencia Tributaria de Galicia (Atriga).
- Os datos de renda (IRPF) dos dous últimos exercicios fiscais vencidos.
- A vida laboral dos últimos 12 meses da persoa solicitante e/ou da persoa cesionaria, de ser o caso, á Tesouraría Xeral da Seguridade Social (TXSS).
- A vida laboral completa, no caso das persoas que inician a actividade agraria e soliciten algún complemento ou beneficio derivado deste feito, á TXSS.
- A procedencia dos rendementos do traballo da persoa declarante, do cónxuxe ou de ambas, no caso de figurar na declaración do IRPF presentada
- A declaración informativa anual de entidades en réxime de atribución de rendas do último exercicio fiscal vencido, no caso de ser persoas xurídicas con forma de sociedade civil ou comunidade de bens.
- A declaración do imposto de actividades económicas (IAE), de ser o caso.
- Os datos do Rexistro Civil.
- Os datos de títulos non universitarios do Ministerio de Educación, de ser o caso.
- Os datos de títulos universitarios do Ministerio de Educación, de ser o caso.
- Os datos do Sistema integral de rastrexabilidade animal (Sitran).
- Certificación oficial de rendemento leiteiro, no caso da axuda asociada para as explotacións que manteñan vacas nutrices.



- Os datos Instituto Nacional da Seguridade Social (INSS) relativos aos custos laborais realmente pagados no ano anterior incluídos os impostos e cotizacións sociais.
- Os datos relativos á inhabilitación para recibir subvencións públicas.
- Título ou documento oficial acreditativo da capacitación agraria, no caso do pago complementario ás persoas agricultoras mozas.
- Certificado de inscrición no Rexistro de Explotacións Prioritarias.
- Certificado de inscricións ou cumprimentos legais, así como calquera outra información que conste no expediente da entidade solicitante ante os organismos ou rexistros correspondentes, incluíndo a documentación acreditativa da inscrición ou situación regular en entidades ou asociacións recoñecidas oficialmente, consellos reguladores das Indicacións Xeográficas Protexidas (IXP) e Denominacións de Orixe Protexidas (DOP), o Consello Regulador da Agricultura Ecolóxica de Galicia (CRAEGA), Agroseguro ou outras organizacións competentes, acreditando en todos os casos o cumprimento dos requisitos exixidos e a vixencia da inscrición ou certificación no momento da presentación da solicitude
- Os datos acreditativos da realización de vendas directas e/ou entregas de leite de vaca a compradores durante polo menos 6 meses ao ano.
- Os datos acreditativos do número de persoas socias pertencentes á sociedade cooperativa agraria ou sociedade agraria de transformación (SAT) que solicita a axuda.
- Os datos acreditativos de entregas de leite de ovino/cabrún.
- Os datos acreditativos do asesoramento recibido, realizado por unha entidade inscrita no Rexistro de Entidades con Servizos de Asesoramento ou Xestión de Galicia (Resaxega).
- Os datos acreditativos de pertenza á Asociación Xestora do Libro Xenealóxico Oficial da Raza ou da asociación oficialmente recoñecida que teña como obxectivo a mellora e conservación da raza pola que se solicita a axuda.
- Os datos relativos ao Rexistro de Explotacións Agrarias (Reaga) e ao Rexistro de Explotacións Gandeiras (REGA).
- Os datos do Rexistro Galego de Identificación de Animais de Compañía (Regiac).



- Os datos que consten na Axencia Galega de Desenvolvemento Rural (Agader) sobre os instrumentos de mobilización de terras no caso de solicitantes de reserva nacional do artigo 25 do Real decreto 1045/2022.

- Os datos da Dirección Xeral de Planificación e Ordenación Forestal no caso de superficies en montes comunais.

- Os datos de pertenza a un grupo de empresas conforme o establecido no artigo 44.1 do Regulamento (UE) nº 2022/128.

- Calquera outro dato que sexa obrigatorio pola normativa comunitaria e/ou nacional para a xestión e control das axudas reguladas nesta orde.

3. Para a tramitación do procedemento MR239G consultarase automaticamente os datos incluídos nos seguintes documentos en poder da Administración actuante ou elaborados polas administracións públicas, agás que a persoa interesada se opoña á súa consulta:

- DNI ou NIE das persoas cedente e cesionaria.

- DNI/NIE/NIF da persoa representante da persoa cedente e/ou cesionaria, de ser o caso.

- NIF das entidades cedente e cesionaria.

- Declaración informativa anual de entidades en réxime de atribución de rendas do último exercicio fiscal vencido no caso de que a persoa cesionaria sexa persoa xurídica con forma de sociedade civil ou comunidade de bens.

- Certificado acreditativo de que as persoas cedente e cesionaria están ao día nas obrigas coa Seguridade Social.

- Certificado acreditativo de que as persoas cedente e cesionaria están ao día coas obrigas tributarias coa Comunidade Autónoma de Galicia, emitido pola Axencia Tributaria de Galicia (Atriga).

- Certificado acreditativo de que as persoas cedente e cesionaria están ao día nas obrigas tributarias co Estado, emitido pola axencia Estatal de Administración Tributaria (AEAT).

- Os datos relativos á inhabilitación para recibir subvencións públicas da persoa cesionaria.



– No caso da persoa cesionaria, datos do IRPF correspondente ao último exercicio fiscal vencido ou, de ser o caso, dos dous últimos exercicios fiscais vencidos.

– No caso da persoa cesionaria, declaración do imposto de actividades económicas (IAE), de ser o caso.

– A vida laboral da persoa cesionaria dos últimos 12 meses, no seu caso.

4. No caso de que as persoas interesadas se opoñan á consulta, deberán indicalo nas solicitudes e achegar os documentos correspondentes. Cando así o exixa a normativa aplicable solicitarase o consentimento expreso da persoa interesada para realizar a consulta.

Excepcionalmente, no caso de que algunha circunstancia imposibilite a obtención de información, poderáselle requirir á persoa solicitante a presentación dos documentos correspondentes ou a documentación complementaria, de acordo co indicado no anexo V.

5. Coa presentación das solicitudes as persoas interesadas autorizan que os datos recollidos nelas sexan incluídos noutros ficheiros informatizados para o seu tratamento coa finalidade de que sexan empregados pola Xunta de Galicia no ámbito das súas competencias. De acordo co establecido no artigo 14, punto 1.k), da Lei 9/2007, do 13 de xuño, de subvencións de Galicia, as persoas beneficiarias e as entidades colaboradoras teñen a obrigaón de facilitar toda a información que lles sexa requirida pola Intervención Xeral da Comunidade Autónoma, o Tribunal de Contas e o Consello de Contas no exercicio das súas funcións de fiscalización e control do destino das subvencións.



## CAPÍTULO II

### Resolucións

#### *Artigo 25. Resolución e pagamento das solicitudes*

A Subdirección Xeral de Xestión da PAC do Fogga na súa condición de órgano instrutor dos procedementos, propoñerá no ámbito das súas competencias para cada unha das solicitudes presentadas, as superficies, o número de animais con dereito a recibir as axudas e os importes que lles corresponden.

A persoa titular da Dirección do Fogga resolverá estas solicitudes, coa excepción das solicitudes de pagamento das subintervencións 65021.05, 65021.06 e 65022.01 indicadas no artigo 2.2, incluídas no procedemento MR250A, onde o órgano competente é a persoa titular da Dirección Xeral de Planificación e Ordenación Forestal.

A dita resolución non pon fin á vía administrativa e, de conformidade co disposto no artigo 121 e seguintes da Lei 39/2015, do 1 de outubro, do procedemento administrativo común das administracións públicas, poderá ser impugnada en alzada, ante a persoa titular da Presidencia do Fogga, no prazo dun mes.

As persoas interesadas poderán consultar as resolucións das súas solicitudes de axudas accedendo ao Portal de axudas PAC e na web do Fogga (<https://fogga.xunta.gal/gl/pac/resoluciones-de-axudas>), así como a través da aplicación móbil Sga@pp. Tamén estarán dispoñibles, de ser o caso, as resolucións de compensación.

As contas bancarias indicadas nas solicitudes únicas deben estar operativas e activas ata a finalización do exercicio financeiro, que remata o 15 de outubro de 2027.

Así mesmo, poderase realizar unha devolución voluntaria dos pagamentos antes do 15 de outubro de 2027, utilizando o modelo "Solicitud de devolución voluntaria de axudas PAC" publicado na web do Fogga: <https://fogga.xunta.gal/gl/pac/campana-actual>



## Artigo 26. *Prazo para resolver*

O prazo máximo para ditar as resolucións de todos os procedementos, salvo o MR2390, será de nove meses contados a partir do día seguinte ao da publicación desta orde no Diario Oficial de Galicia. Transcorrido o devandito prazo sen que se dite e notifique a correspondente resolución, a persoa interesada poderá entender desestimada a súa solicitude por silencio administrativo.

De conformidade co disposto no artigo 122 da Lei 39/2015, do 1 de outubro, a persoa solicitante ou outras posibles interesadas poderán interpor recurso de alzada en calquera momento a partir do día en que se produzan os efectos do silencio administrativo.

## Artigo 27. *Notificacións das resolucións*

Coa excepción do procedemento MR2390, que remata coa sinatura do convenio indicado no artigo 13, as notificacións das resolucións dos restantes procedementos contidos nesta orde faranse conforme o establecido no artigo 45 da Lei 39/2015, do 1 de outubro, mediante a publicación no Diario Oficial de Galicia, cunha ligazón á páxina web do Fogga. Nesta notificación especificaranse a convocatoria, a persoa beneficiaria, a cantidade concedida e a finalidade da subvención outorgada, así como, se for o caso, as causas da desestimación, e expresará, ademais, os recursos que procedan contra a resolución, o órgano administrativo e xudicial ante o cal se deben presentar e o prazo para interpoñelos.

As persoas interesadas propostas como beneficiarias disporán dun prazo de dez días para a aceptación da resolución. Transcorrido o dito prazo sen que se produza manifestación expresa, entenderase tacitamente aceptada e non será admisible a renuncia posterior.

A aceptación da axuda implica a obriga de asumir a aplicación de medidas anti-fraude eficaces e proporcionadas, así como a comunicar ao órgano xestor os casos de sospeitas de fraude no ámbito do Feader.



Calquera persoa que teña coñecemento de feitos que puidesen ser constitutivos de fraude ou irregularidade en relación con proxectos ou operacións financeiros total ou parcialmente con cargo a fondos procedentes da Unión Europea no marco desta convocatoria poderá poñer os ditos feitos en coñecemento a través da canle de denuncias da Xunta de Galicia, na seguinte ligazón: <https://transparencia.xunta.gal/canle-de-denuncias>.

### TÍTULO III

#### **Intervencións de desenvolvemento rural no ámbito do SIXC-**

#### CAPÍTULO I

#### **Disposicións xerais**

##### Artigo 28. *Obxecto e ámbito*

Este título ten por obxecto a regulación das solicitudes das axudas ao desenvolvemento rural e no seu caso, das solicitudes de pagamento, de acordo co establecido no artigo 1, no ámbito do Sistema integrado de xestión e control (SIXC) na Comunidade Autónoma de Galicia.

#### CAPÍTULO II

#### **Axudas a zonas con limitacións naturais ou outras limitacións específicas do Plan estratéxico da PAC 2023-2027**

##### *Sección 1ª. Intervención 6613: Axudas a zonas con limitacións naturais ou outras limitacións específicas, cofinanciadas nun 65% co Feader*

##### Artigo 29. *Persoas beneficiarias*

Poderán ser persoas beneficiarias destas axudas as que cumpran os requisitos de persoa agricultora activa.



Ademais, estas axudas só se concederán ás persoas agricultoras non pluriactivas definidas como:

- a) No caso de persoas físicas, serán aquelas que cumpran a condición de agricultor a título principal (ATP) ou explotación prioritaria de acordo coa lei 19/1995, de 4 de xullo, de modernización de explotacións agrarias.
- b) No caso de persoas xurídicas ou de agrupacións de persoas físicas ou xurídicas, as que cumpran a condición de explotación prioritaria.

### Artigo 30. *Condicións de admisibilidade*

1. A explotación debe atoparse, total ou parcialmente, nunha zona con limitacións naturais de montaña, segundo a designación de zonas establecida no artigo 32 do Regulamento (UE) 1305/2013.

2. A axuda destinarase á parte da explotación que se localice na zona con limitacións naturais de montaña e que pertenza á Comunidade Autónoma de Galicia. A listaxe de municipios e o mapa de zonas resultante está dispoñible na páxina web do Ministerio de Agricultura ([https://www.mapa.gob.es/es/desarrollo-rural/temas/programas-ue/periodo23\\_27](https://www.mapa.gob.es/es/desarrollo-rural/temas/programas-ue/periodo23_27)) e na páxina web do Fogga: [https://formacion-fogga.xunta.gal/pluginfile.php/1801/mod\\_resource/content/20/PEPAC%2023-27/mapazln.html](https://formacion-fogga.xunta.gal/pluginfile.php/1801/mod_resource/content/20/PEPAC%2023-27/mapazln.html).

3. No caso de superficies de pastos só se consideraran aquelas que se atopan no municipio onde estea situada a explotación, así como os municipios lindeiros co municipio da explotación.

4. Poderán acceder a estas axudas as persoas beneficiarias que dispoñan dun mínimo de 2 ha de superficie indemnizable por explotación, situada nos concellos aos que se refiren os puntos anteriores.

5. Para calcular a superficie forraxeira da explotación (pastos permanentes, herbas ou outros forraxes herbáceos), utilizarase a superficie determinada tras os



controles administrativos e no seu caso, tras os controles sobre o terreo, considerando o coeficiente de subvencionabilidade dos pastos (CSP)

6. A carga gandeira de explotación debera ser maior ou igual a 0,7 UGM/ha.

#### Artigo 31. *Importe da axuda*

1. O importe da axuda será de 155 €/ha para o sistema de produción de agricultor non pluriactivo e de 0 €/ha para o sistema de produción de agricultor pluriactivo, segundo se xustifica no documento "Análise do nivel de axuda en zonas con limitacións naturais e outras limitacións específicas ao sistema de agricultor pluriactivo" do Ministerio de Agricultura, Pesca e Alimentación.

Estes importes serán decrecentes en función da superficie indemnizable, segundo se indica a continuación:

- a) Ás primeiras 10 ha correspóndelles o 100 % do importe.
  - b) Entre máis de 10 ha e 25 ha incluídas, o 75 %.
  - c) Entre máis de 25 ha e 60 ha incluídas, o 50 %.
  - d) A partir de máis de 60 ha non se concede axuda.
2. O importe mínimo para recibir a axuda será de 25 €/ha.
3. No caso de que o orzamento dispoñible sexa insuficiente para cubrir os pagamentos a todas as persoas beneficiarias co importe máximo indicado no punto 1 realizaráselle un rateo proporcional para axustar os pagamentos ao dito orzamento.

### CAPÍTULO III

#### **Axudas relativas ás intervencións medioambientais e climáticas do Plan estratéxico da PAC 2023-2027**

Artigo 32. *Elementos e condicións de admisibilidade comúns a todas as intervencións*



En prol dunha maior claridade, neste artigo recóllense os elementos comúns ás distintas intervencións medioambientais e climáticas do Plan estratéxico da PAC 2023-2027, así como as condicións de admisibilidade que deberán de cumprir as persoas beneficiarias que presenten solicitudes de pagamento vinculadas a compromisos aprobados e iniciados ao abeiro da Orde do 15 de marzo de 2023 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (DOG núm. 55, do 20 de marzo) e da orde de 25 de febreiro de 2025 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (DOG núm. 44, do 5 de marzo).

1. O pagamento das axudas concederáse ás persoas agricultoras e/ou gandeiras beneficiarias, titulares de explotación, que se comprometeron voluntariamente a realizar operacións consistentes nun ou en varios compromisos medioambientais e climáticos na superficie agraria da súa explotación, e servirán para compensar os custos adicionais e as perdas de ingresos como consecuencia dos compromisos subscritos.

2. Os compromisos contraeranse por un período de 5 anos, non sendo posible incrementar o número de unidades comprometidas: superficie, animais ou colmeas.

3. As persoas beneficiarias das axudas deberán presentar anualmente unha solicitude de pagamento.

4. As explotacións beneficiarias deberán recibir o servizo de asesoramento específico dunha entidade de asesoramento, inscrita antes do 31 de xaneiro de 2026 no Rexistro de Entidades con Servizos de Asesoramento ou Xestión de Galicia (Resaxega). No caso contrario deberán realizar a formación específica establecida no "PORTAL NOVA PAC" da web do Fogga, que pode consultar na seguinte ligazón: [https://fogga.xunta.gal/gl/pac/pac\\_2023\\_2027](https://fogga.xunta.gal/gl/pac/pac_2023_2027) e que se atopa no apartado de Desenvolvemento Rural/Axudas agroambientais.



5. Nos casos en que as persoas beneficiarias das axudas indicadas no punto 1 deste artigo dispoñan dun servizo de asesoramento específico cunha entidade de asesoramento recoñecida, a dita entidade deberá remitir a información indicada no anexo VI antes do 31 de xullo de 2026. De producirse unha modificación da información recollida, esta deberá de ser comunicada ó Fogga coa maior brevidade posible e, en todo caso, antes do 30 de setembro de 2026.

6. As explotacións estarán dadas de alta no Rexistro de Explotacións Agrarias de Galicia (Reaga) e/ou no Rexistro de Explotacións Gandeiras (REGA) na data de fin de prazo da modificación da solicitude única.

### *Artigo 33. Tipos de solicitudes*

1. Solicitudes de pagamento vinculadas a compromisos aprobados e iniciados ao abeiro da Orde do 15 de marzo de 2023 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (DOG núm. 55, do 20 de marzo).

2. Solicitudes de pagamento vinculadas a compromisos aprobados e iniciados ao abeiro da Orde do 25 de febreiro de 2025 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (DOG núm.44, do 5 de marzo),

Ao abeiro desta Orde non serán admisibles solicitudes para iniciar nin ampliar compromisos no caso das intervencións medioambientais e climáticas xa presentadas en convocatorias anteriores.

### *Artigo 34. Incompatibilidades*

As incompatibilidades das axudas relativas ás intervencións agroambientais e climáticas identifícanse no anexo VII desta orde.



*Sección 1ª. Intervención 65014: Compromisos agroambientais en superficies agrarias. Apicultura para a biodiversidade*

*Artigo 35. Persoas beneficiarias*

Poderán ser beneficiarias desta axuda as persoas apicultoras (persoas físicas ou xurídicas ou grupos de persoas físicas ou xurídicas) titulares dunha explotación inscrita no Rexistro de Explotacións Gandeiras (REGA) que cumpran as condicións de admisibilidade recollidas no artigo 32º e se comprometan voluntariamente a respectar as condicións de admisibilidade específicas e os compromisos indicados no artigo seguinte.

*Artigo 36. Condicións de admisibilidade específicas e compromisos*

1. As condicións de admisibilidade específicas destas axudas son as seguintes:
  - Os asentamentos apícolas estarán situados en concellos de Galicia clasificados como zonas con limitacións naturais. Estes concellos pódense consultar no "PORTAL NOVA PAC" da web do Fogga: [https://formacion-fogga.xunta.gal/pluginfile.php/1801/mod\\_resource/content/20/PEPAC%2023-27/mapazln.html](https://formacion-fogga.xunta.gal/pluginfile.php/1801/mod_resource/content/20/PEPAC%2023-27/mapazln.html)
2. Os compromisos desta axuda son os seguintes:
  - Manter un mínimo de 80 colmeas en municipios de Galicia designados como zonas con limitacións naturais e distribuídas, polo menos, en 2 alvarizas, cun mínimo de 20 colmeas por alvariza.
  - Manter as colmeas comprometidas durante os 5 anos que dura o compromiso. Para estes efectos, considéranse comprometidas e primables un máximo de 80 colmeas por alvariza.
  - A distancia entre as alvarizas da mesma persoa beneficiaria será, polo menos, de 1 km. Ademais, para seren primables, as coordenadas de localización de cada alvariza figurarán obrigatoriamente na solicitude de pagamento e deberán constar na base de datos oficial do REGA.



### Artigo 37. *Importe da axuda*

O importe desta axuda será de 20 €/ha. Estímase unha superficie pecoreada por colmea de 1 ha.

### *Sección 2ª. Intervención 65051: Compromisos de conservación de recursos xenéticos*

#### *Subsección 1ª. Subintervención 65051.01: Fomento de razas autóctonas ameazadas de erosión xenética (SIXC)*

### Artigo 38. *Persoas beneficiarias*

Poderán ser persoas beneficiarias desta axuda as persoas agricultoras e/ou gandeiras (persoas físicas ou xurídicas ou grupos de persoas físicas ou xurídicas) titulares dunha explotación inscrita no Rexistro de Explotacións Gandeiras (REGA) que cumpran as condicións de admisibilidade recollidas no artigo 32º e se comprometan voluntariamente a respectar os compromisos indicados no artigo seguinte.

### Artigo 39. *Compromisos*

Os compromisos desta axuda son os seguintes:

- Dispor dun mínimo de 5 UGM primables dunha ou varias das razas autóctonas en risco de erosión xenética de bovino (*cachena, caldelá, frieiresa, limiá e vianesa*) e equino (*cabalo de pura raza galega*), e/ou dun mínimo de 2,5 UGM primables dunha ou varias das razas autóctonas en risco de erosión xenética distintas do bovino e equino (*ovella galega, cabra galega, porco celta e galiña de Mos*).
- Manter as UGM primables comprometidas de razas autóctonas en risco de erosión xenética durante os 5 anos que dura o compromiso.
- Participar no programa de mellora xenética da raza.
- Ter inscrito o gando no libro oficial de rexistro xenealóxico da raza.



#### Artigo 40. *Importe da axuda*

O importe desta axuda será de 200 €/UGM.

#### *Subsección 2ª. Subintervención 65051.02: Conservación de variedades autóctonas en risco de erosión xenética (SIXC)*

#### Artigo 41. *Persoas beneficiarias*

Poderán ser persoas beneficiarias desta axuda as persoas agricultoras e/ou gandeiras (persoas físicas ou xurídicas ou grupos de persoas físicas ou xurídicas) titulares dunha explotación inscrita no Rexistro de Explotacións Agrarias de Galicia (Reaga) que cumpran as condicións de admisibilidade recollidas no artigo 32º e se comprometan voluntariamente a respectar as condicións de admisibilidade específicas e os compromisos indicados no artigo seguinte.

#### Artigo 42. *Condicións de admisibilidade específicas e compromisos*

1. As condicións de admisibilidade específicas desta axuda son os seguintes:

- Non se aplicarán lodos de depuradora na integridade da superficie da explotación.

2. Os compromisos desta axuda son os seguintes:

- Dispor dunha superficie mínima de 2 hectáreas de trigo autóctono en risco de erosión xenética das variedades *Callobre* ou *Caaveiro*.
- Emprego de semente rexistrada acreditada mediante factura ou reemprego desta na mesma explotación, durante un máximo de 3 anos.
- Manter o caderno de explotación actualizado. Este caderno terá o contido indicado na web do Fogga: <https://fogga.xunta.gal/gl/pac/guias-persona-usuaria>

A posible redución de superficie non poderá ser superior ao 10% da superficie inicialmente comprometida e deberá de manterse sempre a superficie mínima correspondente.



#### Artigo 43. *Importe da axuda*

O importe desta axuda será de 320 €/ha.

#### *Sección 3ª. Intervención 65013: Compromisos agroambientais en superficies agrarias. Compromisos de fomento e xestión sustentable de pastos*

*Subsección 1ª. Subintervención 65013.04: extensificación de prados; subintervención 65013.05: extensificación pastos arbustivos e arborizados, e subintervención 65013.06: convivencia co lobo*

#### Artigo 44. *Persoas beneficiarias*

Poderán ser beneficiarias desta axuda as persoas agricultoras e/ou gandeiras (persoas físicas ou xurídicas ou grupos de persoas físicas ou xurídicas) titulares dunha explotación inscrita no Rexistro de Explotacións Gandeiras (REGA) que cumpran as condicións de admisibilidade recollidas no artigo 32º e se comprometan voluntariamente a respectar as condicións de admisibilidade específicas e os compromisos indicados no artigo seguinte.

#### Artigo 45. *Condicións de admisibilidade específicas e compromisos*

1. As condicións de admisibilidade específicas desta axuda son as seguintes:

- Non se aplicarán lodos de depuradora na integridade da superficie da explotación.

2. Os compromisos destas axudas son os seguintes:

A. Extensificación das explotacións gandeiras:

- Dispor dunha superficie mínima de 5 hectáreas de superficie indemnizable. Considérase superficie indemnizable a superficie neta de pastos temporais e permanentes que non sexan de uso en común, agás no caso de comunidades de montes veciñais en man común (CMVMC) titulares de explotación agraria.



- A superficie dedicada a pastos temporais e/ou permanentes deberá supoñer polo menos o 70 % da superficie total da explotación, e deberase manter esta porcentaxe durante todos os anos do compromiso.
- Non labrar, agás para a renovación de pastos que cumpren o seu ciclo produtivo.
- Fertilización preferiblemente orgánica, dando prioridade absoluta aos fertilizantes orgánicos, aproveitando ao máximo os xerados na propia explotación, empregando os de síntese no caso de que non sexa posible cubrir as necesidades do cultivo cos orgánicos.
- Non aplicar herbicidas, agás nos casos autorizados pola autoridade competente.
- Manter unha carga gandeira entre 0,4 UGM/ha e 2 UGM/ha calculada sobre o total de superficie da explotación.
- Manter o caderno de explotación actualizado. Este caderno terá o contido indicado na web do Fogga: <https://fogga.xunta.gal/gl/pac/guias-persona-usuaria>

B. Gandarías extensivas en zonas con presenza de grandes carnívoros nas parcelas situadas en concellos incluídos nos anexos III e V da Orde do 13 de decembro de 2022 pola que se establecen as bases reguladoras das axudas para a prevención dos danos que causan determinadas especies de fauna silvestre. Estes concellos pódense consultar no "PORTAL NOVA PAC" da web do Fogga: [https://formacion-fogga.xunta.gal/pluginfile.php/1801/mod\\_resource/content/20/PEPAC%2023-27/fomento\\_de\\_pastos.html](https://formacion-fogga.xunta.gal/pluginfile.php/1801/mod_resource/content/20/PEPAC%2023-27/fomento_de_pastos.html)

- Cumprir os compromisos da axuda de extensificación das explotacións gandeiras.
- Realizar pastoreo.
- Dispor dun mínimo de 15 UGM na explotación.
- Dispor de sistemas de vixilancia e/ou coidado do gando ante o risco de interacción con grandes carnívoros e mantelos durante todo o período de compromiso: dispositivos de xeolocalización, polo menos no 20 % dos



animais da explotación independentemente da idade dos animais e/ou polo menos, dous cans de garda por explotación das seguintes razas: mastín español, mastín do Perineo e/ou can de palleiro que deberán estar inscritos no Rexistro Galego de Identificación de Animais de Compañía (REGIAC). Estes sistemas de vixilancia e/ou coidado do gando deben estar dispoñibles durante todo o ano e manterse durante todo o período de compromiso.

De producirse unha redución de superficie esta non poderá ser superior ao 10 % da superficie inicialmente comprometida e manterase sempre a superficie mínima específica da subintervención.

Así mesmo, só serán computables as superficies de pastos que estean no concello onde estea localizada a explotación e/ou lindeiros.

#### *Artigo 46. Importe da axuda*

Na axuda por extensificación das explotacións gandeiras establécense os seguintes importes:

- Prados temporais e permanentes: 110 €/ha.
- Pastos arbustivos e pastos arborados: 80 €/ha.

Estas axudas serán decrecentes en función da superficie admisible:

- a) Ás primeiras 40 ha correspóndelles o 100 % do importe.
- b) Entre máis de 40 ha e 80 ha incluída, o 60 %.
- c) Entre máis de 80 ha e 200 ha incluída, o 30 %.
- d) A partir de máis de 200 ha, o 5 %.

Na axuda complementaria en zonas con presenza de grandes carnívoros establécense os seguintes importes:

- Prados temporais e permanentes e pastos arbustivos e pastos arborados: 75 €/ha.



Esta axuda está limitada a un máximo de 50 ha.

*Sección 4ª. Intervención 6503: Compromisos de xestión agroambientais en agricultura ecolóxica*

*Subintervención 6503.17: conversión de cultivos agrícolas ecolóxicos; subintervención 6503.18: mantemento de cultivos agrícolas ecolóxicos; subintervención 6503.19: conversión de viñedos para vinificación ecolóxica; subintervención 6503.20: mantemento de viñedos para vinificación ecolóxica; subintervención 6503.21: conversión de gandería ecolóxica; Subintervención 6503.22: mantemento de gandería ecolóxica; subintervención 6503.23: conversión de apicultura ecolóxica, e subintervención 6503.24: mantemento de apicultura ecolóxica*

*Artigo 47. Persoas beneficiarias*

Poderán ser persoas beneficiarias desta axuda as persoas agricultoras e/ou gandeiras (persoas físicas ou xurídicas ou grupos de persoas físicas ou xurídicas) titulares dunha explotación inscrita nos rexistros de explotacións correspondentes, que cumpran as condicións de admisibilidade recollidas no artigo 32º e se comprometan voluntariamente a respectar as condicións de admisibilidade específicas e os compromisos indicados no artigo seguinte, ademais de adoptar ou manter as prácticas e métodos de agricultura ecolóxica definidos no Regulamento (UE) nº 2018/848 do Parlamento Europeo e do Consello sobre produción ecolóxica e etiquetaxe dos produtos ecolóxicos, así como as técnicas específicas sobre produción ecolóxica.

*Artigo 48. Condicións de admisibilidade específicas e compromisos*

1. As condicións de admisibilidade específicas desta axuda son as seguintes::

- Estar inscrito no Consello Regulador de Agricultura Ecolóxica de Galicia (Craega) cunha solicitude presentada antes do 1 de xaneiro de 2026. Non obstante as unidades estarán inscritas como moi tarde a data do fin do prazo da modificación da solicitude única.



- Non se aplicarán lodos de depuradora na integridade da superficie da explotación..

## 2. Os compromisos desta axuda son os seguintes:

- Empregar técnicas de produción ecolóxica de acordo coa normativa vixente. Para estes efectos, deberá cumprir con todos os requisitos establecidos para obter a certificación como produción ecolóxica.
- No caso das axudas de conversión/mantemento de gandería ecolóxica, manter unha carga gandeira de explotación maior ou igual a 0,4 UGM/ha. En pastos permanentes só será tida en conta a superficie neta que non sexa de uso en común e as superficies situadas no concello da explotación e lindeiros.
- Manter, como mínimo, a superficie inicialmente comprometida durante os anos que dura o compromiso.
- No caso das axudas na apicultura ecolóxica, considéranse indemnizables un máximo de 80 colmeas por alvariza, e soamente serán indemnizables as alvarizas do mesmo apicultor separadas polo menos 1 km. Deberanse manter durante os 5 anos que dure o compromiso un mínimo de 80 colmeas que estean distribuídas, polo menos, en 2 alvarizas cun mínimo de 20 colmeas por alvariza. Ademais, para ser primables, as coordenadas de localización de cada alvariza, que figurarán obrigatoriamente na solicitude de pagamento, deberán de coincidir coas da base de datos oficial do REGA
- Manter o caderno de explotación exixido en agricultura ecolóxica debidamente actualizado.

Os compromisos contraeranse en parcelas fixas. A posible redución das unidades comprometidas non poderá ser superior ao 10 % das inicialmente comprometidas, debendo cumprir coas unidades mínimas correspondentes.

O período de conversión terá unha duración máxima de dous anos en cultivos anuais e pastos e de tres anos en cultivos permanentes. Só poderán recibir as



axudas de conversión as persoas beneficiarias con unidades de produción, superficie ou colmeas, cando o período de conversión remate despois do 1 de xullo de 2026.

#### Artigo 49. *Importe da axuda*

Para agricultura, gandería e apicultura ecolóxica, establécese unha axuda en €/ha excepto para a apicultura ecolóxica, que se establece en €/colmea (estímase unha superficie pecoreada por colmea de 1 ha).

Producións ecolóxicas	Conversión	Mantemento
Cultivos herbáceos (agricultura)	326	275
Cultivos hortícolas (agricultura)	662	560
Froitos de pebida e gouña (agricultura)	505	426
Froitos secos e oliveiral (agricultura)	265	224
Viñedo para vinificación (agricultura)	996	916
Pastos e cultivos forraxeiros (gandería)	433	361
Pastos arbustivos e pastos arborados (gandería)	122	107
Apicultura ecolóxica (apicultura)	40	35

Estas axudas serán decrecentes en función da superficie ou colmeas admisibles:

Agricultura ecolóxica:

- Ás primeiras 20 ha correspóndelles o 100 % do importe.
- Entre máis de 20 ha e 40 ha incluída, o 60 %.
- Entre máis de 40 ha e 80 ha incluída, o 30 %.
- A partir de máis de 80 ha, o 5 %.

Gandería ecolóxica:

- Ás primeiras 40 ha correspóndelles o 100 % do importe.
- Entre máis de 40 ha e 80 ha incluída, o 60 %.
- Entre máis de 80 ha e 200 ha incluída, o 30 %.



- d) A partir de máis de 200 ha, o 5 %.

Apicultura ecolóxica:

- a) Ás primeiras 450 colmeas correspóndelles o 100 % do importe.  
b) Entre máis de 450 ha e 900 colmeas incluída, o 60 %.  
c) Entre máis de 900 ha e 1.500 colmeas incluída, o 30 %.  
d) A partir de máis de 1.500 colmeas, o 5 %.

*Sección 5ª. Intervención 65012: Compromisos agroambientais en superficies agrarias. Compromisos de cultivos sustentables*

*Subsección 1ª. Subintervención 65012.07: leñosos*

*Artigo 50. Persoas beneficiarias*

Poderán ser persoas beneficiarias desta axuda as persoas agricultoras e/ou gandeiras (persoas físicas ou xurídicas ou grupos de persoas físicas ou xurídicas) titulares dunha explotación inscrita no Rexistro de Explotacións Agrícolas de Galicia (Reaga) que cumpran as condicións de admisibilidade recollidas no artigo 32º e se comprometan voluntariamente a respectar as condicións de admisibilidade específicas e os compromisos indicados no artigo seguinte.

*Artigo 51. Condicións de admisibilidade específicas e compromisos*

1. As condicións de admisibilidade desta axuda son os seguintes::
  - Non se aplicaran lodos de depuradora na integridade da superficie da explotación.
2. Os compromisos desta axuda son os seguintes:

Cultivos leñosos:

1. Viñedo en pendente > 20 %.



- Dispor dunha superficie mínima de 0,5 hectáreas.
- Os recintos sitúanse en zonas de pendente > 20 %.
- Compromiso de mantemento de muros, terrazas, bancais ou outros sistemas de protección contra a erosión do solo.
- Non labrar a favor da pendente.
- Non aplicar herbicidas, agás casos autorizados pola autoridade competente.
- Manter o caderno de explotación actualizado. Este caderno terá o contido indicado na web do Fogga: <https://fogga.xunta.gal/gl/pac/guias-persona-usuaria>

## 2. Froiteiras (oliveira, maceira, castiñeiro).

- Dispor dunha superficie mínima de 1 hectárea.
- Non labrar a favor da pendente.
- Mantemento da cuberta vexetal entre liñas de plantación (espontánea ou cultivada).
- Non aplicar herbicidas, agás nos casos autorizados pola autoridade competente.
- Non aplicar fitosanitarios no cultivo, agás nos casos autorizados pola autoridade competente.
- Manter o caderno de explotación actualizado. Este caderno terá o contido indicado na web do Fogga: <https://fogga.xunta.gal/gl/pac/guias-persona-usuaria>

A posible redución das unidades comprometidas non poderá ser superior ao 10 % das inicialmente comprometidas, debendo cumprir coas unidades mínimas correspondentes.

### Artigo 52. *Importe da axuda*

O importe desta axuda será de 200 €/ha.



*Subsección 2ª. Subintervención 65012.04: economía circular. Pequeñas explotacións sostibles*

*Artigo 53. Persoas beneficiarias*

Poderán ser beneficiarias desta axuda as persoas agricultoras (persoas físicas ou xurídicas ou grupos de persoas físicas ou xurídicas) titulares dunha explotación inscrita no Rexistro de Explotacións Agrarias (Reaga), na sección específica de explotacións acollidas ao réxime de venda directa (Sevedi) que cumpran as condicións de admisibilidade recollidas no artigo 32º e se comprometan voluntariamente a respectar as condicións de admisibilidade específicas e os compromisos indicados no artigo seguinte.

*Artigo 54. Condicións de admisibilidade específicas e compromisos*

1. As condicións de admisibilidade desta axuda son as seguintes:

- Non aplicar lodos de depuradora na integridade da superficie da explotación.
- Poderán acollerse a estas axudas as explotacións para a produción de cultivos de horta e froita inscritas no Rexistro de Explotacións Agrarias de Galicia (Reaga) na data de fin do prazo da modificación da solicitude única, na sección específica de explotacións acollidas ao réxime de venda directa (Sevedi).
- A persoa titular da explotación debe estar dada de alta na Seguridade Social nas condicións establecidas no artigo 37 do Real decreto 1047/2022, na data de fin do prazo de modificación da solicitude única ou a explotación debe xerar 1 unidade de traballo agrario (UTA).
- A explotación terá unha dimensión mínima de 0,5 ha e máxima de 3 ha dos cultivos de horta e froita.
- Realizar a declaración anual de parcelas.

2. Os compromisos desta axuda son os seguintes:



- Prohibición de queima de restos de cultivos, coa excepción de queimas por motivos fitosanitarios.
- Compostaxe dos restos de cultivo no caso de producións agrícolas.
- Prohibición do uso de herbicidas, agás casos autorizados pola autoridade competente.
- Manter o caderno de explotación actualizado. Este caderno terá o contido indicado na web do Fogga: <https://fogga.xunta.gal/gl/pac/guias-persona-usuaria>

#### Artigo 55. *Importe da axuda*

O importe desta axuda será de 1.500 €/explotación.

## CAPÍTULO IV

### **Axudas a compromisos forestais do Plan estratéxico da Política Agrícola Común de España para o período 2023-2027**

#### *Sección 1ª. Subintervención 6502.2: compromisos de mantemento de forestacións*

#### Artigo 56. *Ámbito de aplicación*

As persoas beneficiarias que se indican no artigo seguinte poderán solicitar o pagamento dos compromisos de mantemento de forestacións que consiste no pago dunha prima anual de mantemento das forestacións para compensar os traballos forestais de coidado e mantemento posteriores á plantación.

#### Artigo 57. *Persoas beneficiarias*

No ano 2026 poderán solicitar o pagamento dos compromisos mantemento (anualidade 2026) as persoas que cumpran a seguinte condición:



Ter concedida a axuda de compromiso de mantemento de forestacións ao abeiro da ORDE do 20 de decembro de 2024 pola que se establecen as bases reguladoras e se convocan para o ano 2025 os compromisos de mantemento de forestacións, cofinanciados polo Fondo Europeo Agrícola de Desenvolvemento Rural (Feader) no marco do Plan estratéxico da política agrícola común de España para o período 2023-2027 (código de procedemento MR670C).

*Sección 2ª. Subintervencións 65021.05 e 65021.06: compromisos de mantemento da Certificación de servizos ecosistémicos*

*Artigo 58. Ámbito de aplicación*

As persoas beneficiarias que se indican no artigo seguinte poderán solicitar o pagamento do compromiso de mantemento do certificado de servizos ecosistémicos que consiste no pago dunha prima anual para a realización das prácticas de xestión sostible esixidas polo sistema de certificación de servizos ecosistémicos expedido por algún sistema de certificación forestal recoñecido e validado polos mercados nacionais e internacionais; as declaracións de servizos do ecosistema poderán ser: conservación da biodiversidade, servizos das bacías hidrográficas, conservación do solo ou servizos recreativos.

*Artigo 59. Persoas beneficiarias*

No ano 2026 poderán solicitar o pagamento do compromiso de mantemento do certificado de servizos ecosistémicos as persoas que cumpran a seguinte condición:

Ter concedido o compromiso de mantemento de certificación de servizos ecosistémicos ao abeiro da Orde do 27 de decembro de 2024 pola que se establecen as bases reguladoras das axudas relativas aos compromisos forestais de xestión de servizos ecosistémicos, cofinanciadas polo Fondo Europeo Agrícola de Desenvolvemento Rural (Feader) no marco do Plan estratéxico da política agrícola común de España para o período 2023-2027, e se convocan para o ano 2025 (código de procedemento MR670E).



## CAPÍTULO V

### Orzamento

#### Artigo 60. *Dotación orzamentaria*

1. No que respecta aos réximes de axudas directas á agricultura e á gandería recollidos no punto 1 do artigo 2 desta orde, están financiadas integramente polo Fondo Europeo Agrícola de Garantía (FEAGA) e o Fogga exercerá como intermedio na súa xestión, polo que, en aplicación da disposición adicional décimo oitava da Lei 2/2018, do 26 de decembro, de orzamentos xerais da Comunidade Autónoma de Galicia para o ano 2019, en relación coa disposición derradeira segunda desa lei, na cal se establece o carácter permanente da disposición décimo oitava da dita lei, os expedientes correspondentes aos réximes indicados serán xestionados como operacións extraorzamentarias, conforme o sinalado no artigo 46.4 do Decreto lexislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia.

2. No que respecta aos réximes de axuda contemplados no capítulo II, do título III, Axudas a zonas con limitacións naturais ou outras limitacións específicas incluídas no Plan Estratéxico da PAC 2023-2027, cofinanciadas segundo o indicado polo Fondo Europeo Agrícola de Desenvolvemento Rural (Feader), a concesión e o pagamento das axudas realizarase con cargo aos orzamentos do Fogga na aplicación orzamentaria 15.80.712B.772.1:

- a) 9.353.000,00 euros para as axudas a zonas con limitacións naturais en áreas de montaña, no código de proxecto 2025.00001, intervención 6613, subintervención 6613\_04.

Estas axudas están cofinanciadas ao 65 % polo Feader, ao 22% pola Xunta de Galicia e ao 13% pola Administración Xeral do Estado.

3. No que respecta aos réximes de axuda recollidos no capítulo III do título III, cofinanciados segundo o indicado polo Fondo Europeo Agrícola de Desenvolvemento



to Rural (Feader), o pagamento das axudas correspondentes á anualidade 2026 das intervencións medioambientais e climáticas do Plan estratéxico da PAC 2023-2027 convocadas na campaña 2023 e na campaña 2025, realizarase con cargo aos orzamentos do Fogga na aplicación orzamentaria 15.80.712B.772.1:

Denominación	Código proxecto	Importe da anualidade 2026 (en €)
Subintervención 65014.01: apicultura para a biodiversidade	2023.00002	1.672.440,00
Subintervención 65051.01: fomento de razas autóctonas ameazadas de erosión xenética (SIXC)	2023.00009	2.527.266,00
Subintervención 65051.02: conservación de variedades autóctonas en risco de erosión xenética (SIXC)	2023.00008	160.499,20
Subintervención 65013.04: extensificación de prados	2023.00004	10.868.327,80
Subintervención 65013.05: extensificación de pastos arbustivos e arborizados	2023.00013	529.816,00
Subintervención 65013.06: convivencia co lobo	2023.00014	3.187.225,50
Subintervención 6503.17 e 6503.18.- Liña: cultivos agrícolas ecolóxicos	2023.00005	363.801,06
Subintervención 6503.19 e 6503.20.- Liña: viñedos para vinificación ecolóxica	2023.00006	23.157,96
Subintervención 6503.21 e 6503.22.- Liña: gandaría ecolóxica	2023.00012	6.861.432,43
Subintervención 6503.23 e 6503.24.- Liña: apicultura ecolóxica	2023.00011	316.260,00
Subintervención 65012.07: leñosos	2023.00015	176.114,00
Subintervención 65012.04: economía circular. Pequenas explotacións sostibles	2023.00010	48.000,00

Estas axudas están cofinanciadas ao 80 % polo Feader, ao 4% pola Xunta de Galicia e ao 16% pola Administración Xeral do Estado.

4. No que respecta aos réximes de axuda recollidos nas seccións 1ª e 2ª do capítulo IV do título III desta orde, cofinanciados ao 80 % polo Feader do PEPAC 2023-2027, ao 4% pola Xunta de Galicia e ao 16% pola Administración Xeral do Estado, a concesión e o pagamento das axudas realizarase con cargo aos orzamentos da Dirección Xeral de Planificación e Ordenación Forestal conforme se indica de seguido:



a) Aplicación 15.03.713B.770.0 2024 00105, compromisos de mantemento de forestacións, anualidade 2026, cunha prima anual para compensar os traballos forestais de coidado e mantemento posteriores á plantación, correspondentes á intervención 65022. Compromisos de mantemento de forestacións e sistemas agroforestais, subintervención 65022\_01. Mantemento de forestacións ou repoboacións forestais, por un importe de 1.052.128 euros no código de proxecto 2024 00105..

b) Compromisos de mantemento do certificado de servizos ecosistémicos, anualidade 2026, incluídos na intervención 65021. Compromisos forestais de xestión:

- Subintervención 65021\_05. Certificación de servizos ecosistémicos\_1:

- para entidades beneficiarias distintas das entidades locais: aplicación 15.03.713B.770.0, por un importe de 43.529,20 euros no código de proxecto 2024 00101.

- para entidades locais: aplicación 15.03.713B.760.0, por un importe de 1.674,20 euros no código de proxecto 2024 00101.

- Subintervención 65021\_06. Certificación de servizos ecosistémicos\_2:

- para entidades beneficiarias distintas das entidades locais: aplicación 15.03.713B.770.0, por un importe de 33.788,79 euros no código de proxecto 2026 00071.

- para entidades locais: aplicación 15.03.713B.760.0, por un importe de 1.325,80 euros no código de proxecto 2026 00071.

Disposición adicional primeira. *Incremento das dotacións previstas*

De acordo co previsto no artigo 31 da Lei 9/2007, do 13 de xuño, de subvencións de Galicia, as dotacións orzamentarias indicadas na disposición anterior poderán incrementarse, sen necesidade dunha nova convocatoria, cando se produza un incremento dos créditos derivado:

a. Dunha xeración, ampliación ou incorporación de crédito.



- b. Da existencia de remanentes doutras convocatorias financiadas con cargo ao mesmo crédito ou créditos incluídos no mesmo programa ou en programas do mesmo servizo.
- c. Dunha transferencia de crédito, se o procedemento de concesión da subvención é o previsto no artigo 19.2.

#### Disposición adicional segunda. *Obriga de información*

Ademais da documentación complementaria que, durante a tramitación do procedemento, lles poidan exixir os órganos competentes para a xestión de cada axuda ou prima, as persoas solicitantes das axudas previstas nesta orde teñen a obriga de facilitar toda a información que lles sexa requirida polo Servizo de Auditoría Interna dos fondos agrarios europeos do organismo pagador, pola Intervención Xeral da Comunidade Autónoma, polo Tribunal de Contas e polo Consello de Contas, no exercicio das funcións de fiscalización e control do destino das axudas públicas, así como a que lles sexa solicitada por calquera órgano comunitario de inspección ou control.

Así mesmo, as persoas solicitantes das axudas previstas nesta orde teñen a obriga de facilitar ao organismo pagador, á autoridade de xestión, aos avaliadores designados ou a outros organismos en que a dita autoridade delegue a realización deste tipo de tarefas, toda a información necesaria para poder realizar o seguimento e a avaliación do PEPAC 2023-2027.

De acordo co establecido no artigo 59.4 do Regulamento (UE) nº 2021/2116 do Parlamento Europeo e do Consello, do 2 de decembro de 2021, sobre o financiamento, a xestión e o seguimento da política agrícola común e polo que se derroga o Regulamento (UE) nº 1306/2013, e no artigo 44.1 do Regulamento de execución (UE) nº 2022/128 da Comisión, do 21 de decembro de 2021, polo que se establecen disposicións de aplicación do Regulamento (UE) nº 2021/2116 do Parlamento Europeo e do Consello sobre os organismos pagadores e outros órganos, a xestión financeira, a liquidación de contas, os controis, as garantías e a transparencia, os beneficiarios facilitarán nas solicitudes de axudas e nas solicitudes de pagamento a información



necesaria para a súa identificación, incluída, se é o caso, a identificación do grupo en que participen. A dita información deberá conter, como mínimo:

- Nome da entidade.
- Número de identificación fiscal.
- Nome da entidade matriz e número de identificación fiscal.
- Matriz última e número de identificación fiscal.
- Filiais e números de identificación fiscal.

Aquelas persoas beneficiarias que participen na execución das intervencións e que teñan a obriga de levar unha contabilidade, deberán de contar cun sistema de contabilidade separado ou ben cun código contable axeitado para todas as transaccións relativas a unha operación, en aplicación do artigo 123.2.b.I) do R(UE) 2021/2115.

#### Disposición adicional terceira. *Información ás persoas interesadas*

De acordo co establecido no artigo 14, letra ñ), da Lei 9/2007, do 13 de xuño, de subvencións de Galicia, as persoas interesadas quedan informadas dos aspectos básicos previstos no Regulamento (UE) nº 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento dos seus datos persoais e á libre circulación destes datos (RXPD), e na Lei orgánica 3/2018, do 5 de decembro, de protección de datos persoais e garantía dos dereitos dixitais.

De conformidade co artigo 99 do Regulamento (UE) 2021/2116, infórmase ás persoas beneficiarias das axudas da publicación dos datos que lles concirnen de conformidade co artigo 98 e de que ditos datos poderán ser tratados por organismos de auditoría e investigación da Unión e dos Estados membros para protexer os intereses financeiros da Unión.



Disposición adicional cuarta. *Transparencia e bo goberno*

1. Deberá darse cumprimento ás obrigas de transparencia contidas no artigo 17 da Lei 1/2016, do 18 de xaneiro, de transparencia e bo goberno, e no artigo 15 da Lei 9/2007, do 13 de xuño, de subvencións de Galicia.

2. En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrar á Administración, ao organismo ou á entidade das previstas no artigo 3.1 da Lei 1/2016 a que se encontren vinculadas, logo de requirimento, toda a información necesaria para o cumprimento por aquela das obrigas previstas no título I da citada lei.

Disposición adicional quinta. *Transmisión de información á Base de datos nacional de subvencións (BDNS)*

De conformidade co previsto nos artigos 17.3.b) e 20.8.a) da Lei 38/2003, do 17 de novembro, xeral de subvencións, transmitiranse á Base de datos nacional de subvencións a información requirida por esta, o texto da convocatoria para a súa publicación na citada base e o seu extracto no *Diario Oficial de Galicia*.

Disposición adicional sexta. *Modificación do Plan estratéxico 2023-2027 da PAC*

1. O disposto nesta orde, naqueles elementos desta que se vexan afectados pola modificación do PEPAC, queda condicionado a que a Comisión Europea dite a decisión de aprobación da dita modificación.

2. Non obstante o establecido no punto 1, no caso de que, analizados os expedientes das intervencións ou subintervencións contidas nesta orde, e feitos os controis correspondentes, aínda non se ditase a decisión de aprobación da modificación do PEPAC por parte da Comisión Europea, a Subdirección Xeral de Xestión da PAC do Fogga poderá solicitar un informe á autoridade rexional de xestión do PEPAC, que determinará se, atendendo ao estado de tramitación da dita modificación, resulta posible a aplicación dos elementos a que se refire o punto 1 desta disposición na elaboración da proposta de resolución de concesión das axudas.



### Disposición derogatoria única

Quedan derogadas todas as disposicións de igual rango ou inferior a esta orde en todo aquilo en que non estean de acordo co establecido nela.

### Disposición derradeira primeira. *Habilitación normativa*

1. Facúltase a persoa titular da Dirección do Fogga, no ámbito das súas competencias, para ditar as instrucións precisas para a execución desta orde.
2. Facúltase a persoa titular da Dirección do Fogga para modificar os anexos contidos nesta orde. Tal modificación deberá ser obxecto de publicación no Diario Oficial de Galicia e na páxina web do Fogga.

### Disposición derradeira segunda. *Entrada en vigor*

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 13 de febreiro de 2026

María José Gómez Rodríguez

Conselleira do Medio Rural

INSÍRASE NO DOG

A secretaria xeral técnica

Marta Forés Lojo



## ANEXO I

### **Normativa de aplicación segundo o indicado no punto 2 do artigo 1**

- Lei 30/2022, do 23 de decembro, pola que se regulan o sistema de xestión da política agrícola común e outras materias conexas.
- Real decreto 1177/2023, do 27 de decembro, polo que se modifican diversos reais decretos ditados para a aplicación en España da política agrícola común.
- Real decreto 1045/2022, do 27 de decembro, sobre dereitos de axuda básica á renda para a sustentabilidade da política agrícola común.
- Real decreto 1046/2022, do 27 de decembro, polo que se regula a gobernanza do Plan estratéxico 2023-2027 da política agrícola común en España e dos fondos europeos agrícolas Feaga e FEADER.
- Real decreto 1047/2022, do 27 de decembro, polo que se regula o sistema de xestión e control das intervencións do Plan estratéxico 2023-2027 e outras axudas da política agrícola común.
- Real decreto 1048/2022, do 27 de decembro, sobre a aplicación, a partir de 2023, das intervencións en forma de pagamentos directos e o establecemento de requisitos comúns no marco do Plan estratéxico 2023-2027 da política agrícola común, e a regulación da solicitude única do sistema integrado de xestión e control.
- Real decreto 1049/2022, do 27 de decembro, polo que se establecen as normas para a aplicación da condicionalidade reforzada e da condicionalidade social que deben cumprir as persoas beneficiarias das axudas no marco da política agrícola común que reciban pagamentos directos, determinados pagamentos anuais de desenvolvemento rural e do Programa de opcións específicas pola distancia e a insularidade (Posei).
- Real decreto 1050/2022, do 27 de decembro, polo que se modifica o Real decreto 1311/2012, do 14 de setembro, que establece o marco de actuación para conseguir un uso sustentable dos produtos fitosanitarios.
- Real decreto 1051/2022, do 27 de decembro, polo que se establecen normas para a nutrición sustentable nos solos agrarios.
- Real decreto 1053/2022, do 27 de decembro, polo que se establecen normas básicas de ordenación das granxas bovinas.



- Real decreto 1054/2022, do 27 de decembro, polo que se establece e se regula o Sistema de información de explotacións agrícolas e gandeiras e da produción agraria, así como o Rexistro Autonómico de Explotacións Agrícolas e o caderno dixital de explotación agrícola.
- Real decreto 147/2023, do 28 de febreiro, polo que se establecen as normas para a aplicación de penalizacións nas intervencións recollidas no Plan estratéxico da política agrícola común, e se modifican varios reais decretos polos que se regulan distintos aspectos relacionados coa aplicación en España da política agrícola común para o período 2023-2027.

Adicionalmente, para os efectos da tramitación das primas anuais e dos compromisos contemplados indicadas no capítulo IV do título III, será de aplicación o establecido nas seguintes normas:

- Orde do 20 de decembro de 2024 pola que se establecen as bases reguladoras e se convocan para o ano 2025 os compromisos de mantemento de forestacións, cofinanciados polo Fondo Europeo Agrícola de Desenvolvemento Rural (FEADER) no marco do Plan estratéxico da Política Agrícola Común de España para o período 2023-2027 (Código de procedemento MR670C).
- Orde do 27 de decembro de 2024 pola que se establecen as bases reguladoras das axudas relativas aos compromisos forestais de xestión de servizos ecosistémicos, cofinanciadas polo Fondo Europeo Agrícola de Desenvolvemento Rural (FEADER) no marco do Plan estratéxico da política agrícola común de España para o período 2023-2027, e se convocan para o ano 2025 (código de procedemento MR670E).
- Orde do 15 de marzo de 2023 pola que se regula a aplicación dos pagamentos directos á agricultura e á gandería e das axudas ao desenvolvemento rural suxeitas ao sistema integrado de xestión e control (códigos de procedemento MR250A, MR239G, MR239K, MR239O, MR240D, MR241C e MR241D), para a concesión das axudas relativas ás intervencións ambientais e climáticas do Plan estratéxico da PAC de España 2023-2027 (PEPAC) (DOG núm. 55, do 20 de marzo).
- Orde de 25 de febreiro de 2025 pola que se regula a aplicación dos pagamentos directos á agricultura e á gandería e das axudas ao desenvolvemento



rural suxeitas ao sistema integrado de xestión e control (códigos de procedemento MR250A, MR239G, MR239K, MR239O, MR239Q, MR240D, MR241C e MR241D), para a concesión das axudas relativas ás intervencións ambientais e climáticas do Plan estratéxico da PAC de España 2023-2027 (PEPAC) que iniciasen novos compromisos ao abeiro desta orde (subintervención de razas autóctonas en risco de erosión xenética (SIXC) (65051.01), liña de cultivos agrícolas ecolóxicos (6503.17 e 6503.18), liña de gandaría ecolóxica (6503.21 e 6503.22) (DOG núm. 44, do 5 de marzo).

– O Plan estratéxico da PAC 2023-2027 (PEPAC) de España para a axuda da Unión financiada polo Fondo Europeo Agrícola de Garantía e o Fondo Europeo Agrícola de Desenvolvemento Rural, aprobado pola Decisión de Execución da Comisión C (2022) 6017 final, do 31 de agosto de 2022, sendo posteriormente modificado por:

- A Decisión de Execución da Comisión C (2023) 5746 final, do 30 de agosto de 2023,
- A Decisión de Execución da Comisión Europea C (2024) 6133 final, do 30 de agosto de 2024
- A Decisión de Execución da Comisión C (2025) 5713 final, do 14 de agosto de 2025.

## ANEXO V

### Documentación complementaria

A. Para todos os procedementos (excepto o procedemento MR239O):

– Documento de autorización de sinatura no caso de que a persoa solicitante, cedente e/ou cesionaria non sexa a que asina a solicitude ou a comunicación.

B. Solicitude única e modificación da Solicitude única (procedementos MR250A e MR240D).



1. Pagamento suplementario para as persoas agricultoras mozas que comecen a súa actividade agrícola.

– Cando a persoa solicitante non sexa persoa física, documentación que permita verificar que as persoas agricultoras mozas exercen o control efectivo da persoa xurídica. A súa participación no capital social é a mesmo que a da persoa socia maioritaria e tomará parte no órgano do goberno con igual ou maior poder de voto.

– Cando a persoa solicitante non sexa responsable dunha explotación recoñecida como explotación agraria prioritaria ou non sexa beneficiaria dun plan de incorporación de mozos, documentación que acredite que posúe un nivel de capacitación agraria suficiente.

2. Para as axudas relativas á subintervención 65051.01: razas autóctonas en risco de erosión xenética:

– Certificado asinado pola persoa técnica responsable do Programa de mellora xenética de participación da persoa solicitante no citado programa.

### C. Alegacións ao Sixpac (procedemento MR239K).

Deberase presentar a seguinte documentación en función do tipo de alegación solicitada.

#### 1. Alegacións principais:

Tipo	Definición
1	Cambio de uso nun recinto completo.
2	Cambio de sistema de explotación (secaño/regadío) para todos os usos Sixpac, agás os usos non agrarios nun recinto completo.
3	Partición dun recinto para cambiar o uso dunha parte deste.
4	Partición dun recinto para cambiar o sistema de explotación (secaño/regadío) dunha parte deste.
5	Existencia de parcela localizada en zona urbana que ten uso agrícola.
9	Cambio do CSP nun recinto completo de pastos.
11	Elementos da paisaxe: inclusión, eliminación, cambio de tipoloxía e/ou modificación de xeometría.



12	<p>Reinicio da actividade agraria nun recinto por algunha destas circunstancias:</p> <ul style="list-style-type: none"> <li>– Recinto con cultivo abandonado. Incidencia 117.</li> <li>– Barbeito de máis de 5 anos. Incidencia 158.</li> <li>– Superficie queimada. Incidencia 159.</li> <li>– Cultivo permanente con actividade de mantemento 5 anos consecutivos. Incidencia 177.</li> <li>– Pasto permanente con actividade de mantemento 5 anos consecutivos. Incidencia 186.</li> <li>– Recinto inactivo. Incidencia 199.</li> <li>– Pasto sen actividade. Incidencia 211.</li> </ul>
13	Outras non previstas anteriormente.
14	Partición dun recinto de pastos para cambiar o CSP nunha parte deste.
26	Alegacións á información da capa de franxas de protección dos cauces.
39	Alegación a incidencia 231 – Dispoñibilidade non acreditada

## 2. Documentación para cada tipo de alegación.

Tipo de documentación	Obriga de presentala segundo o tipo de alegación
Acreditación da autoridade competente en materia de augas	Para os tipos 2 e 4 se o cambio é de secaño a regadío.
Certificado de dereitos de rega ou rexistro de auga expedido pola Administración competente en materia de augas.	Para os tipos 2 e 4 sempre.
Saída gráfica do Catastro de urbana coa parcela catastral obxecto da alegación.	Para o tipo 5 sempre.
Memoria descritiva que xustifique a necesidade da eliminación ou modificación do elemento estrutural.	Para o tipo 11 cando se trate dunha alteración dun elemento da paisaxe existente.
Autorización do organismo competente no ámbito forestal, ambiental, de augas, etc., no caso de que sexa necesaria.	<ul style="list-style-type: none"> <li>– Para o tipo 11 cando se trate dunha alteración dun elemento da paisaxe existente.</li> <li>– Na incidencia 159 do tipo 12, para recuperar a subvencionabilidade dunha superficie queimada</li> </ul>
Nos cambios nos que parte ou a totalidade dun recinto pase dun uso non subvencionable a un uso subvencionable, un mínimo de dúas fotografías datadas e xeorreferenciadas, indicando sobre a saída gráfica do visor o punto onde se tomaron e a orientación.	Obrigatorio para todas, excepto os tipos 2 e 4.
Documentación xustificativa da posesión do recinto e do seu dereito de uso: contrato de arrendamento ou parzaría, contrato de compravenda, nota simple do Rexistro da Propiedade, etc.	Para Alegacións á incidencia 231, tipo 39 – Dispoñibilidade non acreditada.



	<p>Cando a superficie do recinto sexa maior de 1 ha, e para os seguintes tipos de alegación:</p> <ul style="list-style-type: none"> <li>– Tipos 1 e 3 nos que se realiza un cambio de uso dun recinto con uso non subvencionable a un uso subvencionable.</li> <li>– Tipo 5.</li> <li>– Tipo 12 en recintos inactivos (con incidencia 199).</li> </ul>
<p>Outra documentación xustificativa das alegacións ao Sixpac presentadas que se considere conveniente (por exemplo: fotografías datadas, indicando sobre a saída gráfica o punto onde se tomaron e a orientación).</p>	

D. Solicitud de asignación de dereitos de axuda básica á renda da reserva nacional (procedemento MR241C).

– Deberase presentar a documentación que se indica no anexo IV do Real decreto 1045/2022.

E. Comunicación de cesións de dereitos de axuda básica á renda (procedemento MR241D).

- Deberase presentar a documentación necesaria para xustificar o tipo de cesión solicitado de acordo co indicado no anexo V do Real decreto 1045/2022.
- Nos contratos de arrendamento de dereitos cuxa vixencia prevexa a posibilidade de prórroga, a persoa arrendadora e a persoa arrendataria deberán presentar, antes do fin do prazo de comunicación de cesión de dereitos, unha declaración responsable conxunta que se indique que, de ser o caso, está prorrogado e o tempo de duración desa prórroga.

F. Primas anuais indicadas no capítulo IV do título III: coa solicitud de pagamento das primas indicadas deberá presentarse unha declaración doutras axudas que financien a actividade subvencionada, coa indicación do importe e a súa procedencia, en que deberán figurar o número de expediente e a sinatura da persoa solicitante ou representante



G. Compromisos de mantemento da certificación de servizos ecosistémicos, contemplados no capítulo IV do título III. Coa solicitude de pagamento deberá presentarse a seguinte documentación:

a) Certificado, en vigor e expedido polo obtentador do certificado, de que os terreos adheridos aos compromisos de servizos ecosistémicos da persoa beneficiaria da prima contan cun certificado de servizos ecosistémicos expedido por algún sistema de certificación forestal recoñecido e validado polos mercados nacionais e internacionais. O certificado recollerá, como mínimo, os seguintes datos: nome da unidade de manexo, tipo de servizo ecosistémico certificado, número de hectáreas certificadas, data de vixencia e data de expedición, código de licencia e código de certificado.

b) Copia do documento de certificación de servizos ecosistémicos (DCSE) validado pola entidade auditora e listado de montes do obtentador do certificado.

## ANEXO VI

### **Informe e ficheiro informático que deben remitir as entidades de asesoramento**

#### **Informe**

....., con NIF ....., actuando en representación da entidade ....., con NIF....., e enderezo en ....., inscrita no Rexistro de Entidades con Servizos de Asesoramento e Xestión de Galicia (Resaxega), co número de rexistro.....

Informa:



Que no ficheiro denominado ..... se inclúe unha relación de ..... persoas solicitantes das axudas agroambientais que actualmente reciben un asesoramento especializado por persoal técnico desta entidade.

Que para cubrir a solicitude única deste ano se lles prestou asesoramento sobre os requisitos e condicións de admisibilidade, compromisos, liñas de base e condicionalidade aplicables ás axudas solicitadas.

Que durante o ano en curso se visitaron as explotacións destes asesorados e, se existían deficiencias nos elementos destas (superficies, animais, instalacións, etc.) para os efectos das axudas solicitadas, fixéronse as oportunas recomendacións para a súa mellora ou emenda entregando os correspondentes informes aos asesorados.

....., ..... de ..... de 202\_

Sinatura

### Ficheiro

O ficheiro informático remitirase ao correo electrónico [sac.fogga@xunta.gal](mailto:sac.fogga@xunta.gal), terá formato Excel ou Access, en calquera das súas versións, e incluírá os seguintes campos:

- Razón social ou nome e apelidos da entidade de aconsellamento.
- NIF da entidade de aconsellamento.
- Razón social ou nome e apelidos do solicitante.
- NIF do solicitante.
- Número da solicitude da PAC do solicitante.
- Nome e apelidos da persoa técnica que fai o asesoramento.
- NIF da persoa técnica que fai o asesoramento.



## ANEXO VII

### Incompatibilidades entre as axudas relativas ás intervencións ambientais e climáticas do Plan estratéxico da PAC 2023-2027

Intervención/subintervención	Incompatibilidades
Subintervención 65012.07. Leñosos	Subintervención 65012.04. Economía circular. Pequenas explotacións  Intervención 6503. Compromisos de xestión agroambientais en agricultura ecolóxica.
Subintervención 65012.04. Economía circular. Pequenas explotacións	Subintervención 65012.07. Leñosos.  Intervención 65013. Compromisos agroambientais en superficies agrarias. Compromisos de fomento e xestión sustentable de pastos.  Subintervención 65014.01. Apicultura para a biodiversidade.  Intervención 6503. Compromisos de xestión agroambientais en agricultura ecolóxica.  Subintervención 65051.02. Variedades en risco de erosión xenética.
Intervención 65013. Compromisos agroambientais en superficies agrarias. Compromisos de fomento e xestión sustentable de pastos	Subintervención 65012.04. Economía circular. Pequenas explotacións  Intervención 6503 Compromisos de xestión agroambientais en agricultura ecolóxica
Subintervención 65014.01. Apicultura para a biodiversidade	Subintervención 65012.04. Economía circular. Pequenas explotacións  Intervención 6503 Compromisos de xestión agroambientais en agricultura ecolóxica
Subintervención 6503. Compromisos de xestión agroambiental en agricultura ecolóxica	Subintervención 65012.07. Leñosos.  Subintervención 65012.04. Economía circular. Pequenas explotacións  Intervención 65013. Compromisos agroambientais en superficies agrarias. Compromisos de fomento e xestión susten-



	<p>table de pastos.</p> <p>Subintervención 65014.01. Apicultura para a biodiversidade.</p>
Subintervención 65051.01. Razas autóctonas en risco de erosión xenética	
Subintervención 65051.02. Variedades en risco de erosión xenética	Subintervención 65012.04. Economía circular. Pequenas explotacións

